





63118/B

The Library of the  
Wellcome Institute for  
the History of Medicine

MEDICAL SOCIETY  
OF  
LONDON  
DEPOSIT

Accession Number

Press Mark

ROTUNDIS, P. de



Digitized by the Internet Archive  
in 2019 with funding from  
Wellcome Library

<https://archive.org/details/b30509361>





CATHARRI SUFFOCATIVI  
EJUSQUE  
CURATIONIS  
HISTORIA

*Auctore Petro de Rotundis.*

MATRITI: ANNO MDCCXXVIII.

Ex Tipographia Conventus B. V. M. de  
Mercede, Redemptionis Captivorum.



CATINARI SUFECATINE

ELUSQUE

CURATONIS

HISTORIA

Nomine Petro de Rotundis

ANNO: MDCCXXIII

Ex Typographia Conuictus R. V. M. 46  
Macedo, Rotundis Caput



CENSURA R. P. M. Fr. JOANNIS

*Interian de Ayala, Sacri Regii ac Militaris Ordinis Beatæ Mariæ de Mercede Redemptionis Captivorum, apud Salmanticenses Doctoris Theologi, atque ibidem Theologiæ cum Sacrarum Interpretatione Linguarum Professoris emeriti, S. C. M. à Concionibus, atque ejusdem in Regio Immaculatæ Conceptionis Confessu Theologi &c.*

**J**USSU ac mandato Perillustr. D. Doctoris Christophori Damasii, Illipulitani Canonici, Inquisitoris Ordinarii, Generalisque Vicarii Matritensis, eiusque tractus in Archi-diœcesi Toletana &c. vidi et perlegi Opusculum, cui titulus est: *Catharri Suffocativi ejusque Curationis Historia*, Author verò nobilis et eruditus vir D. Petrus de Rotundis, in Romana, ut vocant, Sapientiâ Doctor Medicus ac Professor &c. Utque de amicissimi capitis lucubratione ingenuè ac candidè pro meo more promam id quod sentio, præfari, imò testari,



si id opus est , in primis libet memet rei  
Medicę rudem omnino Censorem , aut ve-  
rò prorsus Lectorem imperitum. *Æscula-*  
*pīi Sacra* , *Machaonisque* , aut *Podalirii*  
templa nullus attigi ; tametsi fando audive-  
rim , viguisse nuper alibi *Riverios* , *Senner-*  
*tos* , *Etmulleros* , *Malpighios* , *Sydenha-*  
*nos* , quemadmodum et apud nos fulserunt  
olim ingenti cum laude , *cū fata Deusque*  
*sinebant* , quos suspexit Europa , *Lagunas* ,  
*Mercatos* , *Bravos* , *Vallesios* , aliosque non  
paucos. Quare quantum ad id spectat , alii  
in hac professione seriò versati atque exper-  
ti de Opusculo hoc , sicuti et de quovis alio  
Medico , sensum suum , per me licet pro-  
mant , sententiamque ferant. Sed tamen  
non ob id suffragium meum , qualecum-  
que illud est , promere proferreque in me-  
dium recusaverim ; cū libellus hic aliis  
nominibus non solum probari , sed prorsus  
commendari jure merito debeat. Etenim  
præterquamquod nihil continet , quod Ca-  
tholicę ac Sacrosanctę Fidei dogmatibus ,  
bonisvè omninò moribus adverfetur , quod  
qui-



quidem dixisse mei muneris partes exposcunt, habet præterea duo, quæ mihi nimis arrident, summopereque placent, magis quàm ut verbis complecti queam. Alterum est styli tersa prorsus et concinna elegantia, quâ vel facto ipso docet, posse commodè et scienter res severiorum etiam disciplinarum, atque, ut vocant, facultativas, nitidè ac luculenter tradi, neque opus esse, quod indocti sibi confingunt, ut eo nomine quòd ad scientias attinent, statim oleant sermonis barbariem, dictionisque squallorem et illuviem. Alterum verò magisque præcipuum, quod in hoc opere maiorem in modum elucet, est animi candor prudensque modestia, quâ longè ab scommatibus, dicteriis, conviciorumque plaustris (quod in aliis Scriptoribus viri docti sæpè desiderant) veritatem promit, patefacit, atque ut planè decet ingenuum atque honestum virum, tuetur, explicat, atque exornat. Quare dignus libellus est qui Medicorum præstantissimorum, eruditissimorumque hominum manibus teratur.

Ita censeo, salvo &c. In hoc Regii ac Mi-  
litaris Ordinis Beatæ Mariæ de Mercede,  
Redemptionis Captivorum Matritensi Ce-  
nobio VII. Kal. Januar. Anno à Virg. Part.  
MDCCLXXVII.



*Fr. Joannes Interian*  
*de Ayala.*

Imprimatur. Matriti 16. Januarii 1728.

*Doct. Damasius,*

*V. Mat.*



D. DOCT. ANDREÆ GONZALEZ  
de Barcia in Supremis Conciliis Castellæ  
et Belli Senatoris integer. Censura.

P. D.

**S**upremi Senatus Castellæ præscripto,  
Catharri Suffocativi eiusque Curationis  
historiam à D. Petro de Rotundis Medicinæ  
Professore lucubratam perlegi. In ea non  
minùs inveni, quàm præsumpsi. Continet  
enim quæ nonnisi doctissimum atque ex-  
pertissimum virum deceant; si exactam  
ægri & ægritudinis delineationem; si styli  
candorem; si modestiam spectes. Omnibus  
numeris absoluta manet; adeo ut in ea ni-  
hil possit, me iudice, desiderari. Præmium  
& palmam arripit vigilantissimus Author  
suæ virtutis virtutem ipsam, plaudente  
Claudio,

*Ipsa quidem virtus pretium sibi, solaque latè  
Fortunæ secura nitet, nec fascibus ullis  
Erigitur, plausuve petit clarescere vulgi,  
Nil opis externæ cupiens, nil indiga laudis,  
Divi-*

In Pane-  
gir. Manl.  
Theod.



*Divitiis animosa suis, immotaque cunctis  
Casibus ex alta morealia despicit arce.*

Haud proinde tamen eòsque permittenda  
sibi virtus est, ut non aliquis etiam in Rem-  
pub. ab ea dimanet fructus, qui versatur  
maximè in publicandis egregiis illius operi-  
bus. Quibus delitescantibus vilis illa ac  
inutilis appareret:

Claudian.  
de 4. Con-  
sul. Hon.

————— *Quid enim submersa tenebris  
Proderit? obscuro veluti sine remige puppis,  
Vel lyra quæ reticet, vel qui non tenditur  
arcus.*

Quapropter concedendam, quam postulat  
licentiam, censeo, ut omnes potiantur hac  
eruditissimâ lucubratione: cum præsertim  
neque in Regis jura, nec in bonos mores  
quidquam in ea inveniat. Salvo &c. Ma-  
triti V. Kal. Januar. MDCCXXVII.

*D. Andreas Gonçalez  
de Barcia.*

LICEN.



## LICENCIA DEL CONSEJO.

**D**ON Balthasar de San Pedro Acevedo, Escrivano de Camara del Rey nuestro señor, y de Gobierno del Consejo: Certifico, que por los Señores de él se ha concedido licencia por vna vez al Doctor D. Pedro de Rotundis, vecino de esta Corte, para que pueda imprimir, y vender el Libro, que ha compuesto, intitulado: *Catharri Suffocativi eiusque Curationis Historia*; con tal, que la dicha impresion se haga por el Original que se presentò en el Consejo, y vâ rubricado, y firmado de mi mano, y que antes que se venda se trayga al Consejo con Certificacion del Corrector de estar conforme à él, para que se tasse el precio à que se ha de vender, guardando en la Impresion lo dispuesto por las Leyes de estos Reynos; y para que conste doy la presente. En la Villa de Madrid à quince de Enero de mil setecientos y veinte y ocho.

*D. Balthasar de San Pedro.*



## ERRATA SIC CORRIGE.

Pag. 33. lin. 18. abstrictis, lege adstrictis. P. 40. lin. 18. eâ, lege ea. Pag. 6. lin. 11. par, lege per. Pag. ead. lin. 15. eò, lege eo. Pag. 69. lin. 11. eatenusque, lege eatenus. P. 89. lin. 14. morbus. lege morbus? Pag. 111. lin. 17. causurum, lege caufarum.

Demptis his mendis suo Originali respondet. Matriti 20. Januarii 1728.

*Lic. D. Benedictus del Rio  
Cao & Cordido.*

Correct. Gen.

---

## SUMA DE LA TASSA.

Tassarón los Señores del Consejo este Librito à ocho maravedis cada pliego, como mas largamente consta por la Certificación dada por D. Balthasar de San Pedro. Madrid 21. de Enero de 1728.



## P R Æ F A T I O.

**A**RS Medica prona, siquæ alia, fraudi errorique est. Sunt Artifices, qui ex alienâ credulitate authoritatem nacti quantacumque adlubet eque re suâ vident esse temerè ingerunt obtruduntque imperitis. Alii sunt, qui cum prius deceperint ipsi sese, Populum imprudentes decipiunt. Nihil autem Arti, Artemque invocantibus æquè malum, quàm si fallacibus falsisque ejusmodi ingeniis illius permittatur arbitrium. Artificio capi injuriosum est; errore periculosum. Interest igitur Reipublicæ intercedi quandoque, hancque coërceri licentiam. Quod nec difficile factu est: siquidem à Medicis, quibus Medicinæ fides dignitasque cordi est, quæcumque illiusmodi homines clàm privatimque ex audacia jactitant, palam atque in publicum proferant.



ferantur. Aliud enim est coram Paucis im-  
punè blaterare ; aliud coram Universis rem-  
feriò agi. Posita in conspectu Multitudinis  
veritas invenit patrocinium ; poenam teme-  
ritas. Id animadversionis genus ut convelleret  
malum quod irrepsit ; ita Arti afferet peri-  
tiam , gravitatem , modestiam. Quia verò  
eo in situ oculos nobis miserata sui operis  
Natura collocavit , undè alienam deformati-  
tatem videamus , non æquè nostram ; siquid  
in eo , quod suadeo vindicari , ego ipse  
peccavero ; mihi primo lata lex esto. Inte-  
rea omne tulisse punctum videbor , si , quam  
trado literis ; historiola medicâ , et causam  
meam satis aptè dixero ; & exemplo pro-  
fuero.







diam. Pluviæ namque succedebat Aquilonia tempestas : Aquiloniæ iterum Austrina, & pluvia. Sub finem mensis Aprilis, ac per initia Maji is calor ad viginti dies inexpectatò ingruit, qui vel summâ æstate videri gravis potuisset. Restitit repentè calor ille; excepitque statim constitutio pluvia; mox Aquilonia, quæ frequentior; alternante quandoque et Austrina. Non defuere inter hæc quaterni senique dies præter modum ferventissimi, insequentibus noctibus frigidis, & penè hybernis: neque dies alii, quorum vniuscujusque terminis omnes anni vicissitudines, hyemalem nempe de mane, vespere, & nocte, vernam & autumnalem ad aliquot horas, ad aliquot æstivam experiremur. Morbi exhinc varii excitati, pro varia & peculiari cujusque humorum corporumque habitudine. Catharri præsertim vagati sunt, catharralesque omne genus affectiones, tussesque contumacissimæ; quibus Infantuli Puerulique præcipuè conflictati; & corpora, quæ humoribus redundarent, & viscerum glandu-



dularumque fibras flaccidiores haberent ac laxiores: præ cæteris Philippus, de quo institutus sermo est.

Hic validâ firmâque membrorum mole, procero liberalique corporis habitu, ab obeso quàm à tenui propior, cum hyberna indumenta in verna (quod ratio temporis videbatur exposcere) & ferè æstiva mutasset, cumque vbi è lecto assurgebat, leviori indutus supparo, referatis vndeque fenestris auram frigidiusculam matutinam licentiùs captaret, interclusâ hinc ex habitu corporis transpiratione, experrectus est nono Kal. Quintil. cum catharro haud fanè vulgari. Adjungebantur enim febris paulò minùs quàm acuta, quæ tamen non excederet catharralem; dolor capitis multus cum gravedine, sive Coryzâ; sicca, inanis, & molesta admodum tussis; atque à tussi vigilię. Accedebant lassitudo & languor membrorum; spiritus aliquanto gravior; hinc sitis multa, hinc cibi fastidium; lingua palatoque mucus albidus, sapor subamarus; urinæ sub principio ut



fani hominis ; ubi ab augmento ad statum tendebat morbus , turbatiores imbutæque colore intensiori , quales ferè per vniversum morbi cursum perseverarunt.

Infolentior à comitatu symptomatum videbatur Affectio. Et superiori anno non multò abfimilem passus erat , quam ( vulgaribus auxilijs ad aliquot dies ministratis parùm proficientibus ) misso sanguine , ductâque alvo mox brevî & feliciter expedivi. Id idem in hâc ipsâ rebar maturius faciendum. Nam manifesta ægrotantis corporis plenitudo , febris in acutiem proclivis , dolor capitis vix tolerabilis , spiritus offensus , tussisque acerbitas , quæ de imminente vel Peripneumoniâ vel hæmoptoe facerent haud levem suspicionem , misionem sanguinis suadebant. Cibi verò fastidium , mucus amarorque oris , ipsaque in tanto tamque succulento corpore humorum copia monebant , opus esse purgatione , quâ illi à pulmonibus ad intestina aliquam partem diverterent , quâque simul abstergeretur prima , quam vocant , regio ; unde melior de-



deindè chylosis transmitteretur in sanguinem. Nihilò tamèn minùs, & quia ipse aliquantò cautior timidiorque sum ad magna remedia, ut qui putem non esse festinan-  
tèr & temerè super alienæ vitæ discrimine deliberandum; & quia etiam invaluit in-  
ter artis Medicæ Imperitos ( qui præcon-  
ceptum animo habent stabilibus certisque legibus quasque morborum curationes  
comprehendi ) vulgare illud præjudici-  
um, in affectibus nempe catharralibus sangui-  
nem venâ sectâ mittere, ut citare alvum,  
piaculum esse; distuli in præsentiarum, quæ  
cæteroqui penè digito indicabantur, quoad  
clarior necessitas, aut periculum, si quod  
subreperet, paterentur. Statutâ igitur vnâ  
victus ratione, monui, ut ne beneficio su-  
doris abuteretur. Pronior enim in sudorem  
erat, ut ferè plerique sunt succipleni ho-  
mines: neque non erat anni tempus ad id  
idoneum: & sudore alioqui ipso solvi dif-  
flarique eiusmodi affectus non semel conti-  
git.

Verumenimverò, cum febris nihil re-  
mit-



mitteret, quin immò intenderentur in dies omnia, sitis, inappetentia, pervigilium, atque in primis dolor capitis, quod eousque quassabatur sub vi crudæ, diuque noctuque ferocientis tussis, ut ex Ægri sensu penè diffringeretur; tandem die morbi quartâ indulsi venæ sectionem; quam ille, superioris anni curationis probè memor, anxie & repetitò flagitabat; quamque ego differre diutius sine culpâ non poteram: intercepti enim in pulmone sanguis, oppletis catharrali muco ipsius cellulis; ideoque aut ex morâ inflammatio, & fortè etiam suffocatio, aut canalis cujuscpiam sanguiferi sub ferinâ tussi disruptio satis perspicuè videbantur. Sanguis missus est è Saphenâ, habitâ revulsionis ratione, ad uncias septem. Non largiori manu mittendum censui. Animus scilicet erat non ultra indicationem digredi. Quòd vereretur, ne ex vltiori imminutione sanguinis minuerentur vires, quæ anacatharsi, atque aliquandiu duraturæ tussi suffecturæ erant, & suppetias latere pulmonibus; quorum de laxitate ac debi-



bilitate jam tùm mihi inerat haud obscura suspicio. De humorum enim exhuberantia non erat profectò quod dubitarem. Consilium hoc nostrum casus intercudit. Laxatis nescio quo modo fasciis, quibus obligabatur incisa vena, ad alias nescioquas vncias profusus adhuc sanguis est. Verùm quid exinde mali? Inflammationis, suffocationis, disruptionis metus sublatus è vestigiò est: evanuit statim dolor capitis: sitis mitigata est: corpori membrisque habilitas restituta: tussis facta explicatior multò ac liberior: febris biduo post intermisit: gravedo fluxit expeditius; maturuit paucis post diebus; discussa denique sensim est. Susceptæ indicationi respondit indicatum ferè ad amussim. Tametsi oris amarities, cibique fastidium permanferunt; & (quod erat cautius considerandum) spirandi quoque illa nescioque difficultas, uti coeperat, perseverabat; quam cùm tussis intenderet, & vigilias consequi necesse erat.

Hoc respirationis symptoma cum non  
pari



pari ratione atque alia remittere observa-  
 rem, suspicabar, ne magna aliqua allu-  
 vies jam tum ab initio defusa confertim in  
 pulmones foret: quæ uti bronchia irritaret  
 ad tussim, fluxumque vltiorem per hanc  
 accerferet, ita eadem inferciens, & præ-  
 gravans inspirando expirandoque aëri fa-  
 ceret minus apta; eodemque tempore libe-  
 rior itus reditusque per pulmones sanguini  
 aliqua ex parte interciperetur. Hinc dubi-  
 tabam num satis missum sanguinis esset,  
 numvè iterum, & adhuc iterum, si è re esse  
 videretur, mitti oporteret; quò & semel  
 susceptæ, effectuque non improbatæ indi-  
 cationi tandem satisfieret, & materia ipsa  
 fluxionis subtraheretur. Obversabantur  
 quidem animo alteræ sanguinis missiones;  
 obversabantur quoque et dejectiones, qui-  
 bus humores aliorum ducerem. Verum  
 non videbam, quod sub initio morbi de  
 facili persuaderi Ægrotanti possent, aut mi-  
 hi etiam ipsi, magna artis molimina. Cum  
 creduli homines natura simus eorum quæ  
 speramus: spe verò negligentes exinspera-



tò mala occupant. Hinc factum, quod  
 missis maioribus, sed debitis auxiliis, mi-  
 noribus plus justo fidimus; sequuti com-  
 munem vulgatamque methodum, quâ sci-  
 licet irritatio leniretur, cruda maturesce-  
 rent, maturaque purgarentur per anaca-  
 tharsim. Etsi temporarium & conditiona-  
 le, non quidem perpetuum id ut foret, me-  
 cum ipse decreveram; & sicubi frustrari  
 deliberatione me cognoscerem, quas nunc  
 seponerem, indicationes tempestivas vel  
 deinceps & præstò futuras. Quoniam au-  
 tem in aliud issem consilium, emulsionem  
 præscripsi ex amygdalis & seminibus me-  
 lopeponum, cui papaveracea ad sesqui-  
 dragmam adderentur: unde binis indica-  
 tionibus, irritationi compescendæ, matu-  
 randæque, quæ fluxerat jam & quæ flue-  
 ret, materiæ prospiceretur. Cum verò de  
 visceris atoniâ conjectura esset, eaque non  
 à levibus argumentis; & lactea oleosaque  
 ejusmodi, uti demulcendæ acrimoniæ sunt  
 hebetandisque salium spiculis, ita vim  
 quamdam emolliendi habent laxandique fi-  
 bras,



bras, monui, vt quam præscribebam emul-  
 sionem, semel tantum in die sumeret, sep-  
 tem scilicet horis à prandio, tribus antè  
 coenam. Eà enim ratione, quæ per noctem  
 gravefcere solent, incommoda occupari  
 posse arbitrabar, inductâ per papaverina  
 spiritibus quiete, lenitâ causâ irritationis,  
 ac proinde tussi, coërcitoque hinc fluxio-  
 nis impetu. Æger tamen, qui potionibus  
 omne genus licentiùs atque ad luxuriam  
 abutebatur, non semel uti ego præmonue-  
 ram, sed mane etiam, & quidem jejuno  
 stomacho illam ipsam ingerebat. Quod ip-  
 se sanè nec iusseram, nec probabam: sed  
 neque videbam, cur tantum inde mali ti-  
 meri posset. Quod si auctus deinde mor-  
 bus est, non magno huic facinori prudens  
 Artis Medicus tribuat, sed quærat facti  
 causam magis idoneam. Sperma etiam Cæ-  
 ti statis diei horis ex iusculo capiebat. Inte-  
 rim lentè procedebat expectoratio, crudâ  
 adhuc, difficili, tenacique materiâ; tussis  
 eadem atque antea; spiritus difficultas visa  
 augeri; somnus interturbante tussi modicus.

Qua-



Quatuor interjectis à sectâ venâ diebus  
lene pharmacum ministravi , quo mini-  
mum turbarentur humores ; nonnulla ho-  
rum fieret ad intestina diversio ; & prima  
regio detergeretur. Malueram scilicet ana-  
catharsim. Factum fermè est , licet minus  
quam volueram. Ter alvum posuit : pur-  
gatio inde perquàm pauca , & fanè minor  
quàm solet obtineri ab ejusmodi potiun-  
culâ. Quod contigisse conjectabam , quia  
humores qui ad pectus proruerent , opus  
haberent fortiori stimulo , ut aliò provo-  
carentur. Nihil à purgatiunculâ boni vel  
mali consequutum vidimus , omnibus eo-  
dem, quo prius, loco manentibus , præter  
oris amaritiem , & nauseam ad cibos , quæ  
successivè evanuerunt. Cogitabam de vo-  
mitu. Siquidem expurgandis pulmonibus  
nullum, quàm vomitus, validius auxilium.  
Sed erant quæ prohibere vomitum vide-  
bantur : Æger obæsus , collo brevis , &  
vomendo difficilis ; notoria ipsius plenitu-  
do ; pectus plenum , & grave catharro ; is  
crudus adhuc & tenax ; tussis penè sicca &



ferina. Ne scilicet cuncta hæc aut strangulatum, aut sanguiferi alicuius canalis disruptionem inter vomendum efficerent. Preterea institutum semel vomitum ( siquidem tentassem instituere ) haud satis fore opinabar in tanto humorum apparatu. Repetitus autem, purgandi ergò quod de novo fluxisset, verendum prudenti Medico, puto, erat, ne debile jam viscus faceret adhuc debilius forti, quam suo nisu excitat quassatione. Non absimilis ratio ab opiatis deterrebat. Ne scilicet stupefactis virtute opii spiritibus fibrisque, substineretur expulsio coagmentatæ farcinæ, unde Peripneumonia accerferetur et suffocatio. Pulmones autem graves, distentosque alluvie esse, inducta iam Dispnoea satis superque significabat. Qua propter cum neque vomitus neque narcotica tuta esse indicarem, iis missis, iterum ad expectorationem intendi animum. Quod ut facilius succederet, derivari partem aliquam materiæ fluentis à pulmonibus ad habitum corporis, utile visum est: tentatoque prius universo corpore frictione



etione, & cucurbitulis, sudorem prolicere  
 fum aggressus decocto papavere erratico;  
 tertiâ nempe die post subductam alvum. Su-  
 davit uberrimè semel atque iterum. Et cre-  
 dibile est, si potuisset hâc viâ progredi, non  
 mediocre hinc juvamen fuisse consequutu-  
 rum. Sed quoniam sentiebat sub sudore  
 Æger se penè suffocari ( quod ducentibus  
 difficulter spiritum maximè accidit ) rece-  
 dere ab incæpto necessum fuit. Id nihilo-  
 minus assequuti inde sumus, ut postera die  
 cocta iam materia expui cæperit: tametsi  
 eodem ipso tempore febris recrudit, die  
 nimirum morbi duodecimâ. Inconstans  
 admodum contigerat per hos dies cœli  
 constitutio. Frigidulæ noctes; dies modò  
 nubili, modò pluvii, modò sereni & fer-  
 vidi, modò ventosi; flante nunc Australi spi-  
 ritu, nunc Boreali. Sed iam procedente  
 mense Quintili cæperat æquabiliiori passu  
 fervere æstas.

Maturescere & purgari magis in dies  
 catharrus videbatur: copiosiorque quoti-  
 die sequebatur expectoratio. Sputum affu-



sæ ( ex doctrina Ricardi Mortonis ) aquæ  
 calidæ explicitis fibrillis supernatabat : un-  
 de nihil ei purulenti inerat , ut neque inesse  
 debebat. Quod tamen purgabatur , haud  
 fanè purgabatur absque iterato tussis cona-  
 tu , totiusque corporis concussione. Ne-  
 dum enim tenax id erat & ponderosum  
 quare multâ vi opus erat , ut foras propél-  
 leretur ; sed pulmo forte totus ( quod res  
 ipsa monebat ) infarctus , suâmet farcturâ  
 & sarcinâ impedièbatur , quominus com-  
 primi ipse posset , atque ad propulsionem  
 assurgere. Et eò iam ventum erat , auctâ  
 paulatim dispnæâ , ut lecto decumbere vix  
 posset Æger , nec nisi sedens somnum cap-  
 taret , qualemcumque fineret molestia tuf-  
 fis.

Victus ratio ad id temporis constituta  
 fuerat tenuis quidem, non tenuissima. Qua-  
 lem porrò exposcerent affectus haud ita  
 brevis futurus , & vires ægrotantis ; quæ li-  
 cet integrè sustinebantur , ne tamen labe-  
 factarentur diutino malo verendum erat.  
 Vinum præterea oligoforum , parcâ admo-  
 dum



dum manu per intercapedines permittebatur; quo nempe cibi largioris vices supplerentur, quoque stomacho consuleretur, & viscerum atoniæ.

Hæc ita se fermè habebant, cum die morbi decimaquinta alter Medicus in consortium curationis accersitus est. Persuaserant quippe tandem Concives quidam sui ( qui Regias partes secuti à longo tempore hic degunt ) viro alioqui cordato atque à multiplicitate Medicorum alieno, ut alterum hunc Medicum, nuperum Matriti hospitem, et ipsum conterraneum vellet admittere. Sic ipse Æger mihi retulerat.

Convenimus itaque ambo: aderatque maior Auscultatorum numerus, quàm ut unquam antea in Ægri domo consueffet. Ego fanè, qui fatis novi res physico-medicas ut maximè impervias, multifariamque compositas, nedum non extemporaneâ oratione ( quali vulgò utimur, si quando inter Medicos super ægrotantium rebus delibramus ) sed ne scripto quidem, sine multâ liturâ posse aptè atque accurate comprehen-



hendi : quique idem novi , Medicos , qui eo dicendi genere admirationem vulgi affectant , tedium stomachumque severioribus Medicis taliter ineptiendo facere solitos : & ridiculum contra esse , ac prorsus futile longiorem quàm è re sit , confercire sermonem , quem Assidentes utpote artis ignari , non intelligent , contemnant Periti ; eo etiam nomine , quòd ubi de languore ac discrimine alieno agitur , persequi dicendi gloriolam , importunum sit : Ego , inquam , qui hæc novi , paucis me expedii , & summis penè labiis attigi , potius quàm dixi , quæ ad morbi , de quo agebamus , illiusque causarum curationisque conceptum sufficere visa sunt . Id quod mihi solemne est in collegiis consultatoriis . Siquidem civile mihi , honorificum supervenienti Medico duco , si ipsum ad rei captum haud multis opus habere significo .

Alter autem ut secus atque ego informatus ad artem est , tanquam non ad me unum , sed pro rostris ad Populum dicturus esset , vocis tono declamatorio , totâque



que qualicumque pollet facundiâ rem aggressus , orationem assuit minimè brevem. Et inest Iuveni oris decor , & nescio-  
 qui vocis dicendique lepos. Interim quæ presso ego sermone retuleram , fusiori ille explicabat, suisque firmabat rationibus, atque Scriptorum sententiolis , quàs hâc illâc profunde-  
 bat , sin minus fidelis , certè non cunctabundus : in iisque probandis , quæ ipse illucis-  
 que feceram , totus omnino fuit. Quamobrem eò iocundius mihi erat illius eloquium. Etsi non poteram non ægrius aliquanto ferre , quòd converso in me sermone , frequentius quàm opus erat interpellabat formulâ isthâc profecto prætoriâ;  
*Monitum te volo : Volo te monitum.* Quod tamen rebar , incogitanti magis , atque ex vitiosa loquendi consuetudine , quàm ex arrogantiâ , tam sæpè excidere. Ægerri-  
 mè verò tuli , ubi postremò addidit , Catharro , de quo sibi mecum conveniret, jam et Empyema superinductum, non quidem legitimum , sed certè nothum ; idque à feбри , quæ huius , non autem Catharri



comes est ; ab addito asthma ; atque à profundiori tussi abundè probari. Quo sane malo Empyemate res pessumdata universa est ; laudesque , quibus me illatenus ornauerat , perditę penitissimę. Ego scilicet morbo curationem adhibebam , quem non cognoscerem ; accersitoque homine , opus fuerat , quo meis tandem oculis excuteretur lippitudo. Idcirco semel atque iterum aggrediebar refellere quod de Empyemate dicebatur. Plurimum enim curationis intererat nos inter convenire , adesset , an abesset Empyema ; quantumvis ille ajebat , eandem esse illiusmodi Catharri atque Empyematis curationem. Sed quia Vir in Cætu aderat , generis nobilitate , dignitate personę , omnibusque fortune nominibus undequaque spectabilis , qui cum satis colloquio datum crederet , pauca quędam , ut fieri solet , interloquebatur humanitèr , ne illius ego vocem importunior interciperem , propositum distuli ; & soluta concio est plena Empyematis.

Ægrotus à nunciato novo vulgoque



rariùs audito morbo, non minus quàm ab importunâ Amicorum trepidatione tumultuque perturbatus, quid esset Empyema, unde & quomodo fieret, à me anxius petebat: quod ego uti ultrò docebam; ita pluribus rationibus illud negabam. Conflictabatur namque Viri animus; nec erat patiendum, ut præter morbum ipsum, qui satis angebat, spectro etiam affligeretur. Expectorabat tamen eò pacto, quo dictum est. Aquâ ex marrhubio decoctâ adjuvabatur anacatharsis. Verùm cum ob amaritiem ferre hanc non posset, nunc sperma ceti ex jusculo, nunc oximel scilliticum syrupo de succo hederæ terrestris admixtum ac aquâ pectorali dilutum ex cochleari capiebat. Sub primâ nocte, novi, puto, Medici consilio, è superioribus hybernisque ædibus, quæ nimium sole incalescerent, in imas æstivasque descendit. Cæpit ibi graviorem ducere spiritum. Dubitabam, nùm ex ponderosiore, minusque agili ac libero eò in loco aëre; nùm quia ingravesceret morbus, vel suopte ingenio, vel supe-



additâ novissimâ animi turbatione?

Biduo post Medici iterum convenimus. Ipse datâ opportunitate sciscitatus ab Altero sum; Annè eadem ac antea ei foret de Empyemate sententia? de hoc enim nobiscum convenire non parum pertinere ad institutionem Curationis. Et, aiebam, si profectò non aliunde quàm à febre, spirandi difficultate, & profundâ tussi stabiliret Empyema, quibus positis stabilierat nudiustertius, non potiori jure inde Empyema, quàm aliud morbi genus fore stabilendum. Etenim febrem Empyematis esse comitem, non Catharri, quid confutatione opus erat, cum omnis ratio, experientia omnis, omnis Scriptorum autoritas contrarium asserat; & rari incidant, si modò levissimos excipias, sine febre catharri? Difficilem verò spiritum, sive Asthma mallet vocari, quis uni Empyemati tribuat, cum Catharri non minus Suffocativi proprium & penè inseparabile sit; nec ullum plerumque sit Asthma, quod non catharrus aut faciat, aut comitetur, ut vulgò notum?



tum? Annē non passim quoque contingit  
 Asthma in omnibus ferē pectoris, partium-  
 que ad respirationem facientium morbis,  
 si aliquanto graviores sint; quod videre est  
 in anginā, peripneumonia, utrāque pleu-  
 ritide: quodque item in gravius affectis  
 corde, pericardio, mediastino, diaphrag-  
 mate, hepate, liene; quin & pancreate,  
 ventriculo, utero, ipsisque musculis imi  
 ventris videre non rarō est, quibus nullum  
 sub est Empyema: ut alias multas ejus  
 symptomatis præteream causas, nihilque  
 dicam de Asthmate vel in febribus intensio-  
 ribus quandoque obvio? Tussim denique  
 altiùs atque ab imò pectoris excitatam  
 annon eque in Empyemate, atque in dif-  
 ficiliori catharro, earumque plerisque affe-  
 ctionum, quas modo enumeravimus, se-  
 pius observamus? An non profundior esse  
 debebat in eo, qui præ oculis erat affectu,  
 ubi pleni, distentique mucō pulmones, alie-  
 nā, eaque multiplici, ut purgarentur, ope  
 indigerent? Cum igitur neque febris, ne-  
 que spirandi difficultas, neque tussis pro-  
 fun-



funda quicquam afferrent peculiarius pro  
 Empyemate constituendo , alia sympto-  
 mata & signa erant apportanda , queis mor-  
 bus propius connotaretur : rigor , puta , &  
 horror , vellicatis identidem vibratisque à  
 contento pure membranis : gravitas & sen-  
 sus ponderis in thoracis sinubus : fluctuatio  
 ibidem : sputum purulentum : dolores in  
 pectore vagi : ascensus veluti calidæ ad fa-  
 ciem usque : pulsus intermittens in carpo,  
 qui gravato lateri responderet ; in utroque  
 carpo , si ambo latera essent affecta : reclina-  
 to genua versus corporis trunco præsens  
 suffocatio ; eadem hæc , si super latus laten-  
 ti Empyemati oppositum decumberetur :  
 facilis supra latus affectum ; facillimus resu-  
 pinato corpore supra spinam dorsi decubi-  
 tus : syncopes frequentiores : sudores li-  
 quativi , noctu potissimum : dejectæ vires :  
 maxillarum rubor , alterius , si in altero si-  
 nu thoracis sublateret Empyema ; utrius-  
 que , si in utroque sinu : carnium marcor :  
 oculorum cavitas : extremorum frigus : pu-  
 stulæ super affectâ parte erumpentes ; aut in  
 eadem



eâdem tumor œdematosus ; atque his similia ; quorum pleraque , sin minus omnia , in Empiicis observantur. Horum autem symptomatum , signorumque , de quo agimus , morbus præ se ferebat profectò nullum : cum interim quædam in ipso his omninò contraria conspiciamur. Non rigor ullus , aut horror animadversus unquam est ; non gravitas , non pondus , non fluctuatio ex contentâ aliquâ materiâ in cavitæ thoracis ; non purulentia sputi ; non vagus ullus dolor in pectore , præter eum qui à spasmo tussis crearetur ; non vaporis calidi ascensus ; non in corporum alterutro intermittentia pulsus , quin imò perpetua eius constantia : nedum nulla suffocatio , si pectus genua versùs recurvaret , sed (ex quo in lecto decubitus prohibebatur ) nullus Ægro accommodatior , quàm hic , pòsitus ; ità enim recurvatus , & respirabat liberius & dormiebat , si quid à tussi permetteretur ; non animi ulla deliquia contigerunt ; non præceps ulla dejectio virium , quæ aliàs satis validæ , nec sine admiratione , ad mortem



tem constiterunt : non genarum vitiosus rubor , sed faciei carnisque color , atque habitus ferè idem atque antea , quum sanus esset : nullus corporis marcor ; neque oculi intrò in orbitas conditi , neque aliter immutati : extrema usque caluerunt : nulla pustularum in parte eruptio : nullus ibidem tumor oedematosus. In tantâ caritate & solitudine signorum unum tamen , singulare illud quidem , sed quod loco omnium esset , alter Medicus deprehenderat. Dictitabat enim observatam à se pulsus intermissione- nem ; meque , pro eximiâ suâ urbanitate , oscitantia redarguebat , qui pulsus minus accuratè explorarem. Cum contrà illiusmodi intermissione ( quæ continua nec temporaria esse debet , cum à continuâ & eâdem usque causâ fiat ) neque ego , qui intentis digitis scrutabar , neque Æger ipse , neque alius quispiam ( cuique enim modo sensum habeat facilis cognitu est ) applicitâ carpis manu unquam reperimus. Nos scilicet , obducto digitis callo , plumbeos natura fecit ; illum unum araneorum tactu



tactu donatum voluit. Verùm signa Em-  
 pyematis frustra quærerēs , ubi nullum in-  
 erat Empyema : neque à nullâ causâ deside-  
 randus erat effectus. Nulla præcesserat in-  
 flammatio , quæ pertineret ad interiora  
 thoracis : nulla effusa vomica à superficie  
 pulmonum extimâ : nullus in pleurâ dis-  
 ruptus abscessus : nulla suppurata Angina :  
 nulla alia eiusmodi causa aut præfuerat aut  
 erat. Undenam igitur id Empyema ? At  
 esse , ajebat ille , Empyema nothum,  
 non autem legitimum. Equidem noram  
 differre Empyemata : vel propria strictiori-  
 que græci vocabuli acceptione ; sicque di-  
 ci Empyema quodcumque in ipsâ viscerum  
 substantiâ collectum pus : vel aliquanto la-  
 tiori , quâ nempe in aliquâ è corporis ca-  
 vitatibus suppuratio significatur ; sicque  
 capitis , thoracis , atque abdominis Em-  
 pyemata loco differre : vel communissimâ ,  
 atque inter Medicos vulgatâ , cujus ratio-  
 ne collectio puris in cavo pectoris habetur  
 tantum pro Empyemate ; sicque excipi hoc  
 ab aliis omnibus. Noveram et alias minu-



tulas Empyematum differentias: sed fateor, quæ nothum inter & legitimum tum afferebatur, inaudita eatenus mihi fuerat. Addebat eam ipsam differentiam tradi sigillatim à Daniele Sennerto. Tametsi ab hoc Authore nequicquam petas. Qui tradit utique binas, sed à dextro vel sinistro thoracis sinu, prout in hoc vel illo pus colligitur, desumit priorem; desumit alteram à pure ipso, prout scilicet vel benignius id vel acre & foetidum est. Ast Alter quoque suam Empyematis differentiam à diversitate materiæ videbatur effingere. Quippe qui diceret, illud factum non quidem è sanioso humore, sed è lymphæ catharrali, quæ à pulmonum substantia in thoracis cavum exsudaverat. Verum exsudare lympham, aut simile quidpiam è pulmonibus posse, ut crederent licitum Veteribus fuit, non item nobis, qui sciamus à Malpighio aliisque oculatioribus quàm Majores nostri observatoribus, interiora pulmonis firmissimæ substantiæ esse, utpoteque nihil aliud sint, quàm compago membranarum vesicularum à



Tracheâ productarum , & mirabile quod-  
 dam rete ex arteriis venisque intertextum  
 ipfas vesiculas circumreptans. Tunicam au-  
 tem eius extimam densissimæ ac tenacissimæ  
 esse texturæ, qualem esse par erat, quæ con-  
 tinendo inspirato aëri ad ipsius pulmonis  
 dilatationem aliosque usus provido naturæ  
 consilio dicata sit. Et notissimum ceteroqui  
 est, insufflatum in pulmones aërem, constri-  
 ctâque subitâ ligaturâ tracheâ ut ne per  
 hanc regeratur & inflari distendique eos, &  
 sic inflatos distentosque ad exsiccationem  
 usque fervari, quin ullus ex iis detur exitus  
 concluso aëri. Tantum abest, lympham  
 catharralem tenacem &, ni fallor, cras-  
 siorem aëre, exfudare posse à pulmonibus.  
 Neque non ita esse debuit. Errasset aliàs  
 Natura imprudens, quæ cum viscus homi-  
 ni dederit, per quod facto loci compendio,  
 universo vniuersi corporis sanguini itus re-  
 ditusque perennis futurus erat, quodque  
 tum ad excipiendum continendumque con-  
 tinuò aërem, tum ad perpetui motus di-  
 latationis & pressionis, tum ad vocis, lo-



quelæ , clamoris , tussisque usus destina-  
 verat , laxioris nihilominus , rariorisque  
 substantiæ illud fecisset , percolandisque  
 quotidie Empyematibus opportunum. Fa-  
 tebar equidem Ægrotantis pulmonem plu-  
 ribus è causis debilitatum ; sed non porro  
 eòusque rimosum esse , ut per ejus intersti-  
 tia ullus catharrofis purgamentis pateret  
 diffusus. Ubi enim tale quid uspiam con-  
 tingerit , quæ retentio inspirati aëris , quæ  
 respiratio , quanta vitæ dilatio futura sit ?  
 Ut pro nihilo habeam quod obiter adde-  
 bam , intra exiguum quindecim dierum  
 spatium non adeò facile fieri potuisse id  
 Empyema , eò pacto quo dicebatur. Ete-  
 nim quò factum tam brevè crederemus ,  
 non exsudasse humor roris ad instar , sed  
 effusus ad instar imbris dicendus erat. Cum  
 igitur Empyema etiam nothum ultimò af-  
 fertum ipsâ partis texturâ , ipsâque naturæ  
 necessitate difflatum esset , neque propriæ  
 ullæ notæ adessent , neque causæ ullæ præ-  
 cessissent , quæ ullum ejusmodi affectum  
 vel connotarent vel fecissent ; reliquum de-  
 mum



mum atque huius loci est , ut demonstrem causas , signa , symptomata , cæterosque omnes , quos vidimus consequutos , effectus , uni CATHARRO SUFFOCATIVO speciatim congruere ; illaque omnia huic relata rationibus suoapte ingenio fluentibus explicari.

Id prius quàm exordiar , duo præmittere opus habeo : *redundasse Ægrotum humoribus , & laborasse hunc eundem debilitate ac flacciditate pulmonum.* Et profectò hominem natura subpinguem & succulentum , victu habitum plenissimo , gelidis omne genus potionibus avidius indulgentem , violentius exercitatum identidem , otio identidem diffluentem , humoribus hunc redundare citra omnem controversiam positum est. Quod ad fusius probandum supervacaneum foret plura congerere , cum omnibus qui illum noverint clarum sit. Quum verò Turmarum Prætorianarum Cohortis Italicę è Ductoribus ( Exemptos vocant ) unus idem esset à pluribus annis ; ideòque ubi sui muneris vices ferrent , plu-



ra passuum millia nullâ datâ morâ laxatis  
 equo habenis cursum currere teneretur; de-  
 bilitari ac flaccescere ipsius pulmones sen-  
 sim sensimque in dies oportuerat. Quan-  
 doquidem qui ad latera citatissimi trijuga-  
 lis currus æquè citato neque intermisso cur-  
 reret cursu, aërem ab ipsius currus Triga-  
 riorumque impete sectum ac retrò pulsum,  
 ideòque densiorem, unà cum commixto  
 sæpenumerò elevato pulvere, inspirare con-  
 tinenti quasi inspiratione necesse erat. Facta  
 vero hoc modo, taliumque inspiratorum  
 ingestione, uti celerius validiusque quàm  
 consuetâ inflantur distendunturque pulmo-  
 nes; ita celerius quoque alternari expiratio  
 debet, ac proinde respiratio fieri accelera-  
 tior. Quod certè non fit sine anhelitu res-  
 pirantis & labore partis. Cum non eadem  
 inspirationis ratio sit, atque expirationis.  
 Inspirando patimur tantum: agimus expi-  
 rando; & quidem vehementissimè; si con-  
 tinenti confertæque inspirationi responde-  
 re expirando æquè debeamus. Impetu,  
 hæcinter, vique elasticâ confertim irruen-  
 tis



tis inspirati, ipsoque intermixti pulveru-  
 lenti voluminis validiori momento inflari,  
 dilatari, & justo fortius distendi habet pul-  
 monum compages, in obæso præcipuè  
 corpore, in quo humidiores ii sunt & mol-  
 liores. Quin & illud aliud sub hoc violen-  
 to rei situ consequi necessariò debet incom-  
 modum, quòd & glandularum racemuli,  
 qui non pauci per interiora pulmonum  
 hinc inde deprehenfi à Malpighio sunt, di-  
 latentur iidem & plus equo laxentur ex-  
 pressa derivatâque in ipforum folliculos è  
 pressis reductisque sanguineis ductibus ma-  
 jori, quàm consueverit, lymphæ copiâ.  
 Hoc sæpius, atque per plures annos fa-  
 ctum quùm fuerit, quidni humidior mol-  
 lisque eo in Homine pulmonum fabrica de-  
 bilitanda sensim fuit, suoque robore atque  
 tono tandem dejicienda? Et erat ea fortas-  
 sis à primâ sui conformatione aliquatenus  
 imbecillior; subinde verò negligentiori vi-  
 ctus ratione, violentâque, uti dictum,  
 equitatione in pejus disposita. Addam et  
 aliam causam hoc in loco minimè reticen-  
 dam.



dam. Dum eo pacto equitaret, una cum ipso equo præcipitem pluries actum narrant, non sine præsentissimo vitæ discrimine. Affectâ citatissimo in cursu, quemadmodum præmonstravimus, respiratione, qui profectò sub præcipiti tam ponderosi corporis casu non ulterior tumultus distractusque in pulmonibus futurus erat ab inspirato acervatim diutiusque detento aëre, à proruentibus subitariò trepidanterque spiritibus, à commoto inordinatius sanguine? Harum autem causarum vis effectui ipso constabat. Fluxionibus ab aliquot annis obnoxius Vir erat. Et anno superiori à simili penè catharro malè admodum habuit. Siqua corporis pars morbo intus genito præ reliquis obsidetur, debiliorem eam vel à natura, vel à morbo esse jure dixeris. Si recidivus idem morbus eandem illam deinceps exerceat, multò potiori jure dixeris. Id quod exemplis passim obviis, practicisque observationibus abundè notum. Quemvis igitur mortalium re vel obiter pensitatâ admissurum in Ægro existimo,

tan-



tanquam duo Postulata Geometrica , duo hæc , *humorum nempe multitudinem* , & *Pulmonum debilitatem*. Quibus admis-  
sis , omnia signa symptomata effectusque , quotquot Ægritudo præ se tulit , uni CATHARRO , quem diximus , utpote unicæ propriæque causæ , facillimum re-  
ferre est.

Siquidem obæsius naturâ corpus , ple-  
nâ nutritum manu , plurimo humectatum  
potu , à consuetâ sui muneris exercitatione  
ab aliquo tempore tunc fortè feriatum ,  
transpirando , imò sudando facile , æstivis  
tùm solibus reſeratum laxumque , miræ  
oppidò quantitatis , staterâ judice , esse  
oportebat quod transpirando dimitteret.  
Id ad cutis glandulas semel ablegatum dam-  
natumque , ubi , abſtrictis repente cuta-  
neis porulis , subito coërcitum retrocesse-  
rit , haud mediocres intus turbas debuit  
necessariò excitare , utpote quod & mul-  
tum copiâ esset , & rejectum ab utilibus hu-  
moribus recrementum. Cum verò sangui-  
nis fluentum auctiori jam fermentatione



sub ineunte estate haberetur ; ab regressu  
transpirabilis purgamenti , æquè ac à cessa-  
tione ulterioris transpirationis alium nes-  
cioquem præposterum motum , aliamque  
turbatiorem fermentandi rationem conci-  
pere necesse erat. Hincque inflammatoria  
quædam in eo dispositio , & febris. Cum-  
que novo hocce febrili motu fieri non pos-  
set , ut eterogeneæ particulæ tam quæ se-  
parari transpirando destiterant quàm quæ  
pridem separatæ regressæ mox in commu-  
nionem erant in homogeneas redigeren-  
tur omnes utpoteque numerum modum-  
que excederent , factum , opinor , est ex  
legibus hydrostatices , quod à reliquo  
fluento haud minima ipsarum vis in glan-  
dularum diverticula detruderetur. Quarum  
cas , quæ abreptæ sunt ad caput ( quò plu-  
rimum sanguinis , & quidem purioris , ad  
elaborationem spirituum jugi fluvio fertur )  
ad meningum vicinarumque partium glan-  
dulas continuo divertisse crediderim ; quia  
neque canaliculorum inibi exilitas , neque  
loci ibidem angustia ferrent illiusmodi par-  
ti-



ticularum exhuberantiam admixtionem-  
 que : maximam autem earumdem partem  
 ( siquidem è superiori inferiorique corpore  
 reflua lymphâ unâ cum subeunte chylo &  
 refluxo sanguine à dextro cordis ventriculo  
 tota statim effunditur in Pulmones ) in hu-  
 jus glandulas confestim confertimque pro-  
 fuisse haud citra rationem est , quarum tu-  
 nículas debiles laxas & fluxionibus ob-  
 noxias nuper ostendimus. Hæc ita se ha-  
 buisse, ministratum quoque per initia phar-  
 macum haud obscure confirmaverat. Mi-  
 nimum purgatum ab eo est , & multò se-  
 cùs quàm debuisset. Contigisse conjectan-  
 dum erat ; quia humores caput pectus-  
 que impetentes indigerent irritamento va-  
 lidiori , quo ad intestina deducerentur.  
 Dum remoraretur præ suo lentore & co-  
 piâ in distentis glandulis secreta hæc fæcu-  
 lentior lymphâ acredinem ex morâ ali-  
 quam certò contrahebat , quâ irritata of-  
 cula glandularum excretoria retentam ip-  
 sam lympham funderent exprimerentque,  
 eo fortè pacto , quo vesica urinaria acre



lotium. Hincque fluxio ad nares, five Coryza; similisque in pulmonum cellulas fluxus, five Catharrus. Harum cellularum membranas, quippequæ exquisito sensu donatæ sint partim copiâ & pondere vitio partim & acrimoniâ catharralis latex cum vellicaret, spiritus per nervos in organa expirationis ad exturbandum quod hostile molestumque erat tumultuariò accersibat. Hincque spasmodica convulsio, ac tussis: quam consequi oportuisse vigilias quis non videt? Secrete verò stagnantique in glandulis lymphæ novâ usque copiâ ponè subeunte, nedum ipsarum glandularum cavitates dilatari ampliari ad recipiendumque magis magisque disponi; sed expresso prius humori posterioris excretionem continenter succedere necesse erat: Hincque fluxionis, &, respectu pulmonum, frequentioris tussis perseveratio. Et habet sanè lymphæ id peculiare sibi, commune tamen cum sanguine; ut quâ diffluere semel cæperit, illac confer-tim & successivè penè omnis incumbat; quod



quod in hydrope ascite ex ruptis lymphaticis ; in ptyalismo ab hydrargyro , aliisque etiam spontaneis salivationibus , putata , scorbuticis hypochondriacisque ; in diarrhæâ ipsâ , ni fallor , inque hypercatharsi observare est. Siccam autem , inanem , ideoque molestius laboriosam tussim non nisi glutino , tenacitati , atque altitudini materiæ fuisse tribuendam reor. Quemadmodum immanis illa cephalalgia copiosis , turgentibus , acribusque humoribus danda esse videtur , qui scilicet sub præpostero illo , quem memoravimus , confusoque motu febrili , meninges annexaque vasa copiâ turgentiaque distenderent , distentaque acrimoniâ suâ vellicarent , causaque forent atrocis illiusmodi sensationis. Ab eodem præpostero confusoque sanguinis motu languorem lassitudinemque illam corporis sub primo morbi insultu conjicere fortè licet , obrutis nimirum neque separabilibus eâ in confusione virium instrumentis spiritibus. Ab eodem fortè et sitim ; derivatâ nempe per eum motum , ab

hu-



hujus organo ad patentiores laxioresque capitis & pulmonum glandulas humiditate. Vidimus namque post phlebotomiam, unâ cum febrili illo motu; hæc ipsa tanquam ab eo uno, quasi ab unâ causâ penderent, quâ prius quâ posterius, remisisse omnia. Cibi fastidium, oris amaritiem, lingue palatique mucorem à vitiatâ salivâ, tum palatina tum gastrica quæ à vitiosa interiori saliva seu lymphâ appelleret in palati & ventriculi glandulas; perinde ac ab aliqua in ipso ventriculo alimenti corruptione repetebam. Urinas verò per initia, ut sani hominis fuisse equum erat, etenim communicatum sanguini vitium nondum erat: Ab lymphâ autem alterata non alterari urinas, in praxi medicâ vulgare est. Ubi febris recrudit, cæpitque morbus facta rerum mutatione ad statum vergere, tunc à sanguine, utpotequòd alterationem, vitiumque in suâ crasi jam conceperat, purgamenta quam multa simul excerni opportunum erat. De difficili spiritu, præcipuo & maximè omnium considerabili sympto-

mate,



mate, id fanè putabam: quòd videlicet  
 lymp̃ha, quę conferto jugique rivo in pul-  
 monis vesiculas irrumperet irruperatque,  
 de unâ in aliam ( sunt enim mutuò commu-  
 nicabiles ) perque superiores sensim ad in-  
 feriores, juxta gravium naturam, ad ba-  
 sim usque pervaderet; inibique congesta &  
 coagmentata pulmones suo pondere pre-  
 meret deorsum, distenderetque versus dia-  
 phragma: hæc pressio distentioque causa  
 esset, ut ne tantum aëris inspirando excipe-  
 retur, quantum dilatandæ circumquaque  
 pulmonum moli, propellendoque ritè san-  
 guini necessum foret; utque diaphragma-  
 tis, aliorumque expirationis instrumento-  
 rum festinatus licet omni conatu labor plu-  
 rima ex parte frustraretur. Hincque sangui-  
 nis lentior in pulmone progressus, & diffi-  
 cilis respiratio. Sed cur non putarem, si  
 ipsi, qui à principio ad finem morbi subse-  
 cuti sunt effectus ad rem hanc quomodoli-  
 bet pertinentes, conceptui respondeant  
 omnino singuli: neque aliunde si repetas,  
 eos æquè facilè aut intelligas, aut explices?

Etc-



Etenim ea spirandi difficultas augebatur in dies. Augeri debebat cum esset anacatharsis longè impar fluxioni, & magis magisque in dies inferciret catharrus pulmonum lobos. Causa irritans ex eo cum cresceret, increbrescebat et tussis. Quam laboriosiorrem quoque fieri, mirum non erat: siquidem, uti jam pridem debilium pulmonum tonus distentione à contento onere tussique vehementi & jugi, ita Diaphragmatis sociorumque expirationis instrumentorum assiduo opere exercita attritaque virtus quotidie magis languesceret oportebat. Addehis, quod materia suapte naturâ ipsâque concretionem gravis ab eadem distentione in cellulis arctius conclusa & pressa, validiori & pluries repetito nisu opus erat, quò tandem foras exturbaretur; eâ potissimum, quæ in fundo & propè basim aggesta ab altiori loco per arctiora spatiola, de cellula in cellulam egeri atque efferri sursum habebat ad fauces usque. Id quod specialius patuit per declivia morbi tempora; quando minus quidem videbatur, quod superesset



expectorandum , sed ubi id fieret , nonnisi  
interciso languido & in quo Æger penè  
deficeret , misero labore fiebat. Neque  
multò hinc procul investiganda ratio est  
profundioris , quæ videbatur , tussis. Ete-  
nim labefactato substantiæ pulmonum to-  
no , materiâ ponderosâ in angustiis coactâ,  
inque profundo ex parte sitâ , laboriosum  
expectorationis opus ( etsi concurrerent  
quâ possent et cetera organa ) uni ferè dia-  
phragmati erat peculiarius perficiendum.  
Exinde verò , quòd neque in latera ( ut  
cæpit morbus in pejus ruere ) neque supi-  
nus decumbere , neque erectâ sedere cervi-  
ce Æger posset , nullumque haberet com-  
modiorem positum , quàm si supra ventri-  
culum & viscera abdominis reclinaretur,  
id fermè probatur , quod dictum hucusque  
est. Graves nimirum erant plurimo infar-  
ctu pulmones ; qui ne nimium à concluso  
intus pondere distraherentur , opus habe-  
bant substrato naturalium viscerum sub-  
stentaculo , quo super accommodatius re-  
cumberent ; & unde diaphragmati etiam



aliquid levaminis opisque afferretur ad affiduum ultrò citròque violentum pulsum tolerantius substinendum utiliusque continuandum ; hincque tùm respiratio , tùm expectoratio aliquatenus juvaretur. Nec fanè sperandum erat , quod in latera , supinè , jacere aut sedere erectâ cervice Vir posset , cujus pulmo eâ sarcinâ gravaretur. Ad latera enim si jaceret lobus lobo supincumberet : si resupinato corpore , gravis loborum moles concideret in semetipsam : si erectâ federet cervice , à duobus extremis pulmo universus distractus ut longitudine cresceret , ita decresceret amplitudine : ac proinde à qualicumque ex his positu intercilio spiritus , remoratio sanguinis , & suffocatio immineret. Quod à contrario manifestò constitit circa ultimos morbi vitæque dies ; quando maximam conclusæ materiæ partem exhaustam longa anacatharsi credibile cum esset , et sedebat erectâ aliquantisper cervice , & resupinato stratoque corpore ad aliquot momenta decumbebat , in latera verò pro libito.



At enim nonnulla diximus præpostero ordine ; quæque prius erant dicenda , ad præsens omisimus. Est tamen veniæ locus. A difficili spiritu maximo universi morbi symptomate data opportunitas est , ut quæ ad respirationem , tussim , expectorationem pertinent , naturâ proxima cum sint , gratiâ ordinis non distarent ; quando suus iis quoque ordo deberetur. Sed jam expedio quæ distuli : eaque etiam huius generis Catharro haud esse dissona palam erit. Die morbi duodecima , quæ aliquot diebus siluerat , febris recrudit ; cum nempe æstivus fervor instare magis , & sputum rejici coctum cæperat. Causam investigabam recidivæ , vel potius novæ huius febris. Existimabam verò ab agitationi aëris motu , non minus quàm forti tussis quassatione concitari agique vehementius potuisse spiritus influos : ad hoc à materiâ nunc demum coctâ ( coctio autem istiusmodi nihil ultra est , quàm catharralis lymphæ in bronchiorum vesiculis congestæ stagnantisque corruptio quædam & putrefactio )



aliquid halituum in præterlabentem per pulmones sanguinem adspirasse: quod huic admixtum, utpote fermentum eterogeneum, novam constituerit febris causam, ac deinceps pro perpetuo fomite eidem fuerit. Febris enim hæc per initia levius quidem se habuit; gradatim tamen exinde aucta sub specie putridæ & ferè inflammatoriæ proxima ad usque Ægrotantis interitum prosequuta est; quinimò, quum miserum denique extinxit, abiit omninò in inflammatoriam. Creverat hæcinter eòusque spirandi difficultas, ut, præter præcordiorum angustias & anxietates standique atque inambulandi impotentiam, decumbere nullo modo jam amplius posset, neque ullo situ se noctu diuque continere nisi sedentem, adnixum cubitis, reclinatum super stomachum atque abdomen. Factum hinc est, quòd pedes, post quinos senosvè dies ejus positus, ad confinia usque malleoli tumere visi sunt. Hi pedum tumores solent quidem in Asthmatibus observari. Verum in diuturnis paroxysmis feri admodum,



dum , atque ad eorum ferè extrema. Quare si hoc symptoma difficili respirationi ortum referret suum , & ipsum erat symptoma Catharri , qui causa erat anhelæ illiusmodi respirationis. Etenim positis à catharro respirationis impedimentis , remorari in pulmonibus sanguinem sequi simul debuit , quod cuique notum. Hoc in iis remorato , remorari par erat , qui pone sequeretur , præcipue in pedibus ; quippe qui excarnes cum sint præ reliquis membris & immobiles tum tenerentur , neque motu suo qui cessaret , neque superadnitentium musculorum pressione ascensum sanguinis promoverent. Et aliàs constat ex liquorum staticæ , exserere hos in basi gravitatem suam : basim autem sanguinis in iis , qui stant vel sedent , esse potissimum pedes. Quapropter inducta à detento premente sanguine venarum lymphaticorumque pedes circumrepentium tunicis distentione rariorque texturâ , opinari licebat in carnium tendinum ligamentorumque interstitia fieri ibi subtilioris liqui-



di expressionem. Hincque stagnatio, tumorque. Quia tamen tumor is maturius comparuit, quàm alias consueverit, dubium erat, num ab asthmate esset, num à diutino eomet positu, de quo dictum ægrè nempe refluyente humore ab inferioribus ad superiora: accedente præsertim inæquali robore partis à simili tumore, ex relatu Ægrotantis, vel in statu sano ex quacumque datâ causâ sæpius obsessæ ac debilitatę. Ad postremum nihil aliud fuisse morbum nisi Fluxionem Catharralem, à modo ipso effectuque liquidum fit. Statim inter initia unà cum morbo caput spiritus nescioque gravitas, vix illa quidem sensilis, sed tamen sensilis. Hoc verò symptoma, cui referres tunc temporis, nisi Fluxioni & Catharro, præsentibus coryzâ tussi signisque omnibus catharralibus, imò & causâ evidenti? Nec mediocris esse fluxio debuit, quæ, præter cætera, tale id symptoma, quantumcumque leve, secum à principio ferret. Licet si *humorum multitudinis, pulmonumque ad recipiendum dispositionis* respectus



Etus habeatur , minor speranda illa non erat. Crescebat autem fluxio , infarctusque pulmonum : crescebat simul spiritus gravitas. Ad summam , quo procedebat passu catharrus , eo & respiratio pedisequa. Hec qui viderit , num pendere alteram ab altero dubitabit ? Ubi tandem ferociente usque tussi eò ventum est , ut pulmones omniaque spiritalia instrumenta ferè penitus resoluta ægrè durare operi laborique amplius possent ; quidni respiratio tunc temporis non tam ex inferciente humore ( qui exhaustus longâ anacatharsi plurimâ ex parte esset ) quàm ex organorum resolutione penè omnimodâ miserrimè se haberet : quod per ultima morbi tempora factum est ?

En itaque , quod à causis æquè ac effectibus duximus , nisi fallor , ad evidentiam ; signa & symptomata , quæ & qualiacumque præ se tulit ægritudo , uni quem diximus, CATHARRO, utpote unicæ propriæque omnium causæ amussim congruere. Id quod eramus polliciti. Quod Sicui , quæ nos pro nostro modulo explicuimus, libeat



aliter explicare ( ut in rebus physicis sua  
cuique sunt senfa ) liberum esto. Satis no-  
bis est demonstrasse ea omnia sub certissi-  
mis *humorum multitudinis*, & *pulmonum*  
*atonie* conditionibus, non alium morbum,  
præter illiusmodi CATHARRUM potuisse  
ponere. Quocirca cum non causæ, non signa  
& symptomata Empyematis adessent : quæ  
verò adessent nullo modo Empyemati, Ca-  
tharro omnifariam convenirent ; non erat  
cur supra Catharrum proferretur in me-  
dium Empyema. Quamvis, qui illud jacti-  
taverat, alter Medicus visus deinceps est , re  
fortè accuratius perspectâ , à sententiâ ta-  
citò recessisse. Quod nisi ita erat, qui sum-  
mum jus curationis egrotantisque corpo-  
ris sibi adsciverat , turpissimè porro pec-  
casset paracenthesi prætermisâ. Fuiſſet  
enim ridiculè ineptientis Medici , qui late-  
re intus Empyema seriò crederet , alia quæ-  
cumque deliberatio , quâ manuum opera  
excluderetur. Neque spes aliunde erat adeò  
crassæ , ponderosæ , tenacisque materiæ ab  
imis thoracis sinubus, per interjectam cam-  
que



que languescentem pulmonum substantiam vi tussis atque anacatharsi foras educendæ, antequam Æger in labore deficeret. Atat Paracenthesim instituerit. Quod, quæso, laterum aggredere prius, an dextrum, an sinistrum, an utrumque? Si nihilo tamen minus repertum Empyema nusquam foret, quid tum faceret? Id ferme, reor, quod solent Medici suis nimium creduli phantasmatis ab somniatis Empyematibus sæpe sæpius ludibrio habiti. Non enim adeo vulgaria sunt Empyemata, uti quidam vel sibi, vel imperitiis persuadent: si modo ea exceperis, quæ à vulneribus penetrantibus, à gravibus contusionibus, & quædam admodum rara, quæ sive ab anginâ suppuratâ, sive à rupto abscessu in superficie pectoris cavâ, extimâve pulmonum quandoque resultant. Id autem quod dicimus, in promptu erat, unde posset confirmari, Ægri, ubi tandem obiit, secto cadavere. Et miror, fuisse ab Altero id prætermissum; cum suum esset, siquid aliud maxime, iis quæ ipse asserebat, ne-



gabam ego, authopsiâ ( eiusmodi in rebus  
nodi vindice ) fidem querere.

Verum operam contulimus nimis longam demonstrandis iis, quæ erant meridianâ luce clariora. Revertamur modò ad Morbi & Curationis ordinem, unde primò digressi sumus. Postquam enim quæ inter nos erat super Empyemate disputatio, relictâ potius quàm absoluta est, ait Alter, adessetne illud an contrâ, in eâdem quam ego institueram Curatione, adjuvandâ nimirum anacatharsi, esse utique perseverandum. Putabatque nos dumtaxat quoad prognosim, non autem curandi methodo discrepare. Quapropter integra stetit, qualem ipse conceperam, indicatio: nihil ei additum, nihil demptum. Intereâ Æger pejus habere. Qui triduo antè, quum in superioribus ædibus adhuc degeret, stare poterat; hâc illâc inambulare; in lectulo, sin minus somnum capere, corpus saltem sternere ad libitum; qui crebrò quidem, sed non usqueadeò anhelus spirabat, tussiebatque; qui expectorabat aliquan-



quantò liberius ; qui in inferiores ædes expeditè & nemine adnitente , pedibus descendit suis : Huic eidem triduo post adventum novi Medici , neque stare , neque progredi , neque decumbere momento temporis in lecto dabatur : respiratio multò magis anhela , expectoratio imminuta aut erat , aut videbatur. Quænam tam subitæ decidentis causa ? An morbus , qui per suos gradus ad statum pervenerat : an læsus adhuc magis à mutato loco vitalis mechanismus : an concepto vitæ periculo , spirituum sanguinisque reductio , & quædam veluti refrigeratio ? Multo certè cum conamine & minus expectorabat , quàm opus erat , prægravatis uberiori fluxu pulmonibus. Visum Alteri est ( ut ferius quàm ego & multo vespere ad Ægrum reversus est , quo ferme tempore solent istiusmodi affectus ingravescere ) ut præter eclegma , quod præscriptum ad anacatharsim per me fuerat , olei amygdalini paululum caperet. Id laxatis membranis , ut spasmo contractæ tum fortè tenebantur , satis contulit. Iteratum non



idem præstitit. Et olea mera, ubi absint fibrarum contracturæ, non semper utilia sunt: minùs, ubi de illarum certo in viscere laxitate jam clara aderant argumenta. Quare in sententiâ fui, ut parciùs exhiberentur: cum esset habenda ratio et stomachi, qui aliàs egregiè constabat, & constitit ad mortem usque.

Quum horis pomeridianis Ægrum reviserem, reperi Sacramenta ex Sanctæ Ecclesiæ ritu tanquam proximè morituro apparari. Quod fieri quis improbaret? Improbabam nihilominus maturius id fieri, quàm ex Ecclesiæ consilio. Posse quidem improvisò præfocari Hominem; sed nulla extare eius rei indicia: posse & alia contingere mala, quæ à tussi conceptâque materiâ fieri quandoque solent; Hemoptoen, disrupto ductu aliquo sanguineo; Phthisin, excitato ulcere in pulmone; hujus tandem omnimodam atoniam. Sed isthæc omnia ad id temporis longè abesse: si autem adforent, Sacramentis vel multoties administrandis tempus sine dubio datura. Curre-



re cæteroqui tunc morbum , sive ex suæ naturæ ordine , sive ex culpâ medicinæ , stadium suum. Essetne is bene , an contrà desiturus : essetne lethale quicquam ante tempus intercessurum ? id quidem in posterum monitum iri. Morbum nihil præterea esse nisi Fluxionem Catharralem : ab eâ cæpisse ; ab eâ perseverare. Periculosum fieri à debilitate pulmonum , qui facile recipe-  
rent quod flueret : quod verò flueret , supra modum esse in corpore adeò humoribus redundante. Binis hisce conditionibus *laxâ visceris constitutione , humorumque copia* sublatis , futurum illum fuisse simplicem catharrum nullius curationis fortè indigum. Resistente enim Partis robore , minus intrò receptum ; receptum ipso eodem robore facile & brevè tussi rejectum ; reliquum vel ad corporis habitum , vel ad renes aut alvum secretum fuisset. Si sciri tunc aliquâ arte posset , qualis quantaque esset pulmonum debilitas ; quantaque , & quousque duratura esset humorum fluxio , ex reciproca unius ad alteram ratione , futu-  
rum



rum fortassis, ut aliqua pro occupando rei exitu iniretur supputatio. Verum cum destitueremur eâ mensurâ, differendum iudicium ad septiduum adhuc vel octiduum. Etenim si intra eum terminum, procedente anacatharsi (quandoquidem in eâ constiteramus) nihil vel parum profectum esset, tunc certiori iudicio futurum locum. Equidem hæc sciscitanti Ægro non semel dixi: hæc ipsa et Aliis pluribus, qui tunc temporis me poscebant, quidnam sentirem ipse de statu Ægri.

Nocte sequenti laboriosè habuit, etsi non pejus. Manè nihilo defferre reperi à die præcedenti: expectorabat fatis, multo licet cum labore. Huic labori alius accedebat. Testamentum fecit, & obsignavit. Ad vesperam, ut reverti, percontabantur Adstantes, Num Sacramentum quoque Unctionis esset administrandum? dixisse namque Alterum, quum circa meridiem inde discesserat, signa si nescioque apparent, ut ne differrent, sed vestigio temporis administrarent. Equidem post procura-

tum



tum Viaticum, non repugnabam. Cæterum causam tam anxie sollicitudinis, aut quenam is expectare posset signa non videbam: Sum quippe visu hebes, ut vix videam quæ sunt; videre quæ nusquam sunt, frustra est quod laborem. At superventu alterius Medici hæsitatio omnis sublata est. Consolabatur is languentem, jubebatque bene sperare. Interea tamen, nullis amplius, quoniam opinione tardius adventarent, expectatis signis, nulloque adhibito verborum ambitu, ut extremam unctione semuniret suadebat. Luxit hoc in loco Viri firmitas & Religio. Excepit quod nudis adeo verbis annunciabatur, ut fanè decebat virum fortem, securumque Evangelicæ Veritatis. Sacerdotes præterea accersiti sunt, qui moribundo, ut mos est, per noctem advigilarent. Civilibus, futuræque vitæ curis biduum hoc datum est, curatione ferè intermissa. Quæ autem curationis ratio, quis ordo, quis usus futurus erat in tanta rerum turbatione? Postquam è cubiculo Ægrotantis egressi sumus, Alter è circun-



cunstantium coronâ ad me accedentem  
 conversus ; Jam , inquit , *conclamatum*  
*est de Homine*. Cum ego non ante tem-  
 pus desperare me respondissem ; pensitare  
 ille symptomatum magnitudinem : quæ  
 sicubi afforet spei locus frustra daretur.  
 Et postremò intellexi : quæ tantorum  
 motuum origo erat. Deceptus scilicet ille  
 fuerat à gravitate symptomatum. Sed  
 ubi de læsa respiratione res est , levia ne-  
 quicquam speres ; gravia sunt omnia. Si  
 quid muci paulò tenacius hæreat in limi-  
 ne laryngis , ut epiglottidem aut suspen-  
 dat aut premat , subitariâ tussi præfo-  
 camur. Eodem in discrimine constitui-  
 mur ; si aquæ guttula inter bibendum in tra-  
 cheam deviet. Infantes , Puerulique sæpe-  
 numerò periclitantur non majori de causa ,  
 quàm quòd à tussi quæ mota sint nesciunt  
 excreare. Quamobrem in affectâ respira-  
 tione , non tam symptomatum , quàm cau-  
 sarum conferre rationes , periti Medici est.  
 Causa Asthmatis , sive manifesti sive occul-  
 ti , gravior , puto , est , quàm aquæ guttu-  
 la



la in tracheam diversa. Defatigatos nihilo-  
minus tussi, qui illo affliguntur, inedia,  
pervigilio, totius corporis languore, an-  
xios suspiriososque eo in agone ad plures  
dies, imò et menses perdurare, notum vul-  
gò est; similique paroxismo sæpesæpiùs  
tentatos conflictatosque ad multos annos,  
quandoque ad senectam, vitam protrahe-  
re. In nostro quidem Ægro nescioque pe-  
culiarius spectanda erant; unde, si minùs  
benè cederent, multa intercessura mala ti-  
meri poterant. Ast iis, quæ in posterum ti-  
mentur, in posterum providendum; ne  
fortè, qui futurorum se venditat præviso-  
rem, cæcutire in præsentibus deprehenda-  
tur.

Administratis Sacramentis: Ægro pro  
mortuo habito; mœror domi, & silen-  
tium; tacitæ indignationes; secreta obmur-  
murationes. Vulgatum illicò ubique loco-  
rum est, in triviis, in foro, in privatorum  
domiciliis, in prætorio, jugulatum à me  
Hominem misso sanguine, subductâ phar-  
maco alvo, datis emulsionibus. Neque



ægritudinem dignovisse me, neque pro ratione curasse. Fuisse illum vel sine Ecclesie præfidiis per me decessurum, nisi advocato Altero provisum contrà fuisset. Esseque eundem me illucufque bardum imperitumque, ut ipsam Sacramentorum procurationem tanquam intempestivam & præproperam improbassem; tunc porro cum Æger mittebat animam. Hæc quidem præcones laudum mearum, iidemque rerum medicarum idonei iudices palam & publicitus prædicabant. Quos tamen absolvebat ipse error, quo decepti, seu potius persuasi tenebantur. Quis enim aliàs existimet, adeo illos sui, suæque honestatis oblitos, ut nisi pro certo crederent quod vulgabant, alienam famam, quantulacumque ea sit, eo modo distrahere non puidisset?

Æger nihilominus noctem haud habuit deteriore. Tussit non sine expectoratione: dormiit pauxillum. Interdiu (quippe animum recollegerat, cui confirmando ego in primis adnitebar) expeditius expecto-



Et orabat. Ad id contulisse et suum symbo-  
 lum, creditum est syrupum de Peto mix-  
 tum oximelliti scillitico, quem capiebat ex  
 præscripto alterius Medici. Hic qui de vitâ  
 Ægrotantis paulò antè penitus desperave-  
 rat, ubi vivere adhuc atque abire in me-  
 lius animadvertit, curationis summam pau-  
 latim nunc sibi asciscere. Tumere pedes  
 jam ceperant. Id sibi etiam fano continge-  
 re Vir monebat. Multò magis modò con-  
 tingere equum erat, uno in situ sedenti  
 immotoque per plures dies. Attamen cum  
 copia humorum certò adesset & respiratio  
 anhela, quam illud symptomata ( etsi revera  
 tardiusculè ) sequi assolet, non videbatur  
 ea res incuriosè prætereunda. Posthæc ego,  
 qui utique verebar, ne diuturnæ tussi du-  
 raturi essent pulmones, avertendam, quoad  
 liceret, tussis causam existimabam. Adu-  
 rentia idcirco, quæ pridem proposueram,  
 iterum proponebam, sive scapulis appli-  
 canda, sive ubicumque libitum foret. Item  
 diureticas medicinas, quæ eòdem respice-  
 rent, citâ urinâ. Hæ admisse: vesicantia



neglecta sunt ; abnuente etiam Ægroto ipso , qui dolores reformidaret ; metueretque , ne excitata ulcera positum cæteraque molestias , alioqui satis difficiles , efficerent adhuc difficiliore. Nocte alterâ cum non opus esse Sacerdotibus excubitoribus palam foret , operâ ii suâ egregiè frustrati, dormitum dimissi sunt. Quæ consequuta est, die diætam ( uti vocant ) lacteam , missis omnibus , Alter instituit , me inconsulto ; præscripseratque , ut caprillum ad sequiunciam fumeret singulis horis. Hæc nova deliberatio adlubebat quidem , utpotè quæ parùm abluderet ab eâ , quâ ego emulsiones pridem præscripseram. Lac enim conceptos in sanguine spiritibusque motus mulcere serosis particulis ; butyraceis verò tumultuosa falia hebetare, tussimque lenire aptum erat. Verùm metuumdum contrâ erat, ne sub febris haud fanè mediocri ebullitione , quâ vitiosa pravaque fermenta in primarum digestionum officinas dimittuntur , lac vel concreceret , vel acefceret ; hincque sanguis acrior fieret, quò



quò subinde febris ipsa, unàque irritatio,  
ac tussis intenderentur. Neque à lacte ca-  
prillo, utpote quod suapte naturâ tenue  
minusque nutritivum est, ad eum modum  
speciatim sumpto, satis nutritionis sperari  
poterat; quæ alias in longis morbis debet  
esse aliquantò plenior. Opus præterea no-  
bis tunc erat alimento satis spirituofo, &  
quo vires æquè atque fibræ reficerentur. Id  
experientiâ ipsâ confirmabatur; cum Æger  
per eam diem languidius pejusque mani-  
festò haberet. Quapropter nunciarent Al-  
teri meo nomine, vellet statâ horâ conve-  
nire, quò super hâc re quod magis ex usu  
esset dispiceremus: noluisse me eò incio  
movere quicquam. Statuta hora est. In-  
cassum expectabam: Obtendebantur ne-  
gotia nescioquæ multa. Manè iterum ex-  
pectabam: non convenit. Verba mihi da-  
ri opinabar. Lac tamen amotum est ab au-  
thore ipso. Reversum ad pristinum.

Lacteam hanc ephemeram diætam ex-  
cepit *Spiritus viridis æris compositus*. Hoc  
remedium, cui spes curationis universa

com-



commendabatur, majori cum rumore ut  
 promeretur in usum, perfici in Officinâ Re-  
 gia curatum est. Per eam quam retulimus  
 rerum trepidationem, ipsa etiam natura  
 esse oblita sui muneris visa est. Alvus quar-  
 tâ jam die supprimebatur, quæ singulis ferè  
 diebus antea deiceret. Id bonum Alteri;  
 quippe expectorationi non nociturum: Mi-  
 hi non item; quippe difficilior inde spira-  
 tus. Immisso suppositorio dejecit non sine  
 levamine: fœces figuratæ erant, probique  
 coloris. Quia verò de diureticis convene-  
 ramus, præscribebam ego decoctum ligni  
 Guajaci, Sassafrasique cum modica gly-  
 cyrrhizâ, in quo, statim ac ab igne remo-  
 veretur, millepedes furno exsiccati nodulo-  
 que inclusi affunderentur, quoad refrige-  
 ret. Id enim nedùm potui, pellendæque  
 urinæ, verum etiam expectorationi, febri,  
 & stomacho utile videbatur. Alter, qui  
 præter opinionem cæperat vereri jam, ut  
 Æger evaderet, quandoquidem illusus præ-  
 sagio esset, restitutionis curationisque glo-  
 riam tribui sibi nunc affectabat. Nec dee-  
 rant



rant fortasse, qui id ut faceret hortarentur,  
 reputantes ex usu Ægri id futurum. Et for-  
 tè Æger ipse consentiebat, quem in ali-  
 quam mei diffidentiam adductum tandem  
 credibile erat; cum satis interveniret ob-  
 tectatorum: facileque ceteroqui est per-  
 suadere dolentem, injecto simul mortis  
 metu. Idcirco quæcumque à me confule-  
 rentur, aut fierent, rejiciebat Alter: clan-  
 culum quidem primis à se accersito diebus,  
 & aliquali cum pudore; deinde verò aper-  
 tissimè. Quin ut liberius, omni remoto  
 arbitro, honestiusque, me absente, id  
 posset, diversa atque ego accedebat horâ.  
 Ea partim hinc inde rescibam, partim ocu-  
 lis spectabam meis. Neque proinde me  
 abstinui ab domo Ægri, qui liberalis mi-  
 nimèque levis ingenii cum esset, & amico  
 me animo excipiebat, & nihil me clàm, aut  
 non monito faciebat. Maximè quod nec  
 futuram eam patientiam infructuosam mi-  
 hi sperabam; neque non lucro apponen-  
 dum rebar, siquid in ejus morbi cura-  
 tione addiscerem, & scripto, nè memo-  
 riâ



riâ dilaberetur, ( quod fermè facio ) adnotarem.

Triumphalis igitur ille *Spiritus* apportatus est, quo morbus profligaretur. Excitabatur eò sumpto vividior tussis, & sequebatur expectoratio; quod ab omni alio irritamento fit. Etsi non contemno remedium. Adipe & unguentis, quod ab initio multus commendaverat, inungebat circumquaque thoracem, magnam inde sibi pollicitus utilitatem. Victus rationem (quæ ego peccaveram fortè emendaturus) immutabat. Hodie ut per singulas horas; postriedie, ut per quaternas; perendie (quia adhucdum non bene succedere videbatur) ut per senas horas tribueretur alimentum. Quòd jusculis nimis diu nutriretur, permittebat aliquid cibi solidioris: mox quia difficile ferret, subtrahebat. Adjuvabat iterum expectorationem (in qua unâ stabilis, totusque erat) exhibitâ identidem calidâ. Frigidula etiam, ex ipsius *Ægri* experimento, & quodcumque œsophagum deliniret dilueretque, idem præstabat. Addebat

Looch



Looch sanum de pulmone vulpis, et Syrupum de Erisimo. Tussi defatigatum lassumque lotis naribus temporibusque nunc spiritu vini anthosato, nunc aceto acerri-  
mo recreabat. Actuosa profectò & versatilis medicina; & quâ eliceret adspectantium admirationem! Sed unam eandemque urgere perpetuò indicationem, nescioquid empyricum, dubito, est. Varii esse solent morborum motus, quibus suas Medicus indicationes aut variet, aut moderetur accommodetque: qui probè spectandi intelligendique sunt: quæ quidem res non est ita facilis, ut necessaria. Habenda quoque ratio est et causarum; quæ continentes ipsæ cum sint, morbum si continuent: si cessaturæ spontè sint prius, quàm ægri virtus. Habenda ratio et symptomatum: si quæ principem quandoque morbum velocitate prævertant: aut in alterius speciei morbum degeneraverint. Habenda ratio denique et loci quem morbus occupat, si quem occupat; plurimum namque hoc refert: Ut nihil dicam de aliis pluribus, quæ posita  
I sunt



sunt ultra Medici potestatem. Hæc porro cuilibet Medicorum nota cum sint, curanti Iuveni ignota esse quis dixerit? Attamen integra præterierunt prope omnia. Et sane sunt, qui in unum totis intentis nervis, à cæteris singulis abstrahuntur: suntque alii, qui præsumptâ semel vel confidentiâ, vel desperatione fiunt negligentiores. Quâ certè re prudentiores Medici difficile falluntur; quippe quibus in judiciis artis parùm certi plerumque inesse multiplici experientiâ compertum sit. Illiusmodi autem febris erat adeò pro nihilo habenda: debuitne incuriosè præteriri, ut factum est? Nonne erat considerandum, num peculiaris morbus ea esset, distinctusque à pectoris morbo? numquid ea huic conferret; quæque ab initio hujus videretur effectus, deinde hujus causa mutuo facta esset, ut hic ab illâ penderet? Nonne spectandi erant illius motus? Nonne connotari quidpiam suspicandum erat à sanguinis è naribus stillicidio, quod ter quaterve diversis utique temporibus tentasse naturam vidimus? Annon

in-



inquirendum quoque erat, undenam esset, quòd ritè procedente ad octiduum & amplius anacatharsi, exhaustoque plurimâ ex parte muco quo pulmones obsidebantur, novus tamen modò minùs modò magis usque manaret; uti palam erat ab ipsis expectoratione tussique, quæ licèt diminutæ, nihilominùs perdurabant? Neque erat non observandum, quòd etsi minus gravari pulmones conjici tunc poterat, creber tamen anhelusque spiritus adhuc traheretur. Dispiciendum et erat, quare, cum tussis non adeò frequens esset ac antea, laboriosior quàm antea nihilominus Ægro esset? Bis præterea contigit, postquam pulmones depleti expectorando visi sunt, quòd suppressâ per biduum alvo major, quàm per id temporis soleret, fluxio ad pectus sequuta sit; minueretur contrà, ubi alvus iterùm laxabatur: An id ipsum non erat sedulò providendum? His similibusque neglectis, qualis, quæso, poterat esse curatio? His contrà, accuratiùs aliquantò perspectis non in unâ profectò anacatharsi



Medicus institisset ; sed priori alias , reor ,  
adscivisset indicationes ; aut illâ prorsus re-  
lictâ , provocasset ad aliam.

Equidem , quamvis curationem sub-  
reptam mihi delatam Alteri, videbam ; ideo-  
que minimum de eâ deberem esse sollicitus ;  
nihilominus tamen , quò veteri , quæ mi-  
hi cum Ægro intercedebat , necessitudini  
meæque fidei satisfacerem , haud potui,  
quin nonnulla animadverterem ad ipsius  
bonum ; cui perinde à morbo timebam,  
atque à factiosa curandi ratione. Itaque,  
quemadmodum conjectabam ( quod di-  
ctum superius est ) in parte affectâ conten-  
tisque ejus focum fomitemque febris à pri-  
mo esse , inde scilicet inquinato sanguine ;  
ita fieri posse putabam , ab inquinato sic  
sanguine digestiva inquinari fermenta ; un-  
de vitiatîs palati ventriculi hepatis pancrea-  
tis lymphaticorumque succis vitaretur et  
chylus ; qui sanguini jam degeneri per tho-  
racicum advectus , alteram illi præter na-  
turam ebulliendi causam afferret : hincque  
à binis veluti terminis reciproca intensio  
fe-



febris & continuïtas. Verebar item , ne quod vi febrilis ebullitionis despumabatur è sanguine , plurimum rueret in pulmonum cellulas ( ut solet in partes debiliores ) laxis nempe dilatatisque pulmonalium glandularum tuniculis , illucque humorum fluxu converſo ; unde febris , quæ à catharro efficeretur , fieret ipsa mox mutuâ vice catharro causa & perennitas. Timebam prætereâ , ne sic affectis pulmonibus , sanguinis per eos cursus catenûsque tandem præpediretur , ut visceris inflammatio succederet. Et aderant timoris argumenta , tum præfocata respiratio , tum sanguinis per nares eruptio ; aliò nempe divertente , facienteque impetum sanguine , cujus regressus progressusque liber ad pulmonis limina remoraretur. Idcirco occurrendum febri ; sanguinis ac fermentorum vitia vel tollenda , vel corrigenda ; viscerisque tono unâ providendum existimabam. Pro his , quoad liceret , obtinendis ministrari suadebam , qui vulgò solent , ex aprugno dente & lucii mandibula pulveres , commixto nitro.



nitro. Non tam quia multum fiderem his  
 præsidiis, quam ut Medicus (cui cætero-  
 qui est medicamentorum mirè locuples  
 promptuarium) intelligeret, quod mihi  
 videbatur faciendum esse. Simul quò pe-  
 ctori prospiceretur, mandabam, ut flores  
 sulphuris ad denariolum primo mane su-  
 meret ex ovo forbili: sub vespere verò pi-  
 lulas balsamicas ex descriptione Mortonis  
 ad alterum denarium. Nihil ex iis factum  
 est: prout ab Ægro ipso eiusque Admini-  
 stris postea rescivi: Vel quia quorsum ego  
 tenderem Alter non videret; vel quia pro-  
 grediendum censeret quâ viâ cæperat; vel  
 eâ potissimum ratione, quòd ipse manda-  
 veram. Unum vix impetratum: ut com-  
 positis suo marte pilulis visceri prospexerit,  
 amotis Mortonianis ut plebejis & usu vili-  
 bus. Aliud mox intercessit oppidò lepidis-  
 simum. Gelatinam ex cornu cervi, quâ  
 fieri arte assolet, cum ego utilem judicas-  
 sem, singulis indicationibus accommodam  
 nulli contrariam, comminatus Alter Ægro-  
 tanti est (sic mihi narrarunt) futurum, si  
 eam



eam fumeret , manifestam in perniciem ut se conjiceret. Rebatur , opinor , quam glutinosam in patinâ conspiciabatur , suffecturam materiam catharro fore. Verùm Chymici id viderint ; quibus notum , quàm multum glutinis ab cervino cornu aliisque animalium partibus extremis igne proliant. Quoniam verò scitu facile non erat quandiù fluxio , quandiù tussis & expectorandi necessitas essent duraturæ ; pluraque ab iis & gravia mala consequerentur ( nam præter corporis suspiriosam quassationem , arcebatur somnus ; confectio alimenti , qualequale caperet , pervertebatur ; pulmones aliaque tussis respirationisque organa magis in dies resolvebantur ; tussis novæ usque tussi novæque usque fluxioni stimulus & causa erat ; ut pessum ad postremum dari simul cum viribus totam mechanices rationem timendum meritò foret ) videbam necessario veniendum esse ad medicinas , quæ spiritibus sedandis , quietique ac somno conciliandis repertæ sunt. Futurum enim , si ad aliquot continenter horas



horas suppressâ tussi somno caperetur, ut  
 fatigatæ partes viresque reficerentur, ut  
 minor tunc temporis fieret ad pectus flu-  
 xio, utque recreatis viribus fibrisque par-  
 tium, facilius deindè, siquid fluxisset, tuf-  
 fiendo purgaretur. Quapropter potiuncu-  
 lam descripsi nostrate papavere medicatam,  
 feris horis sumendam. Manè ut reversus  
 ad Ægrotantem sum, comperi præ tussi  
 totam quasi noctem evigilasse; neque  
 sumptam potionem. Ut sequenti nocte su-  
 meret tamen monui: expediret enim. Al-  
 tero mane tussi et pervigilio quassum las-  
 sumque item reperi. Arbitrum curationis  
 Medicum iteratò noluisse sumi præscrip-  
 tam per me potionem: fore quippe, ut al-  
 vus per eam laxaretur; quod in primis exi-  
 tiosum ajebat ille. Instabam nihilominus  
 ut omnimodè sumeret. Soporifera neuti-  
 quam laxare alvum, quin laxam cogere.  
 Neque tum à laxitate alvi metuendum esse,  
 cum ut laxa fieret optandum potius, vo-  
 tisque petendum maximè foret. Videre  
 perspicuè me, distineri medicamentum hoc  
 uno,



uno, quòd me authore proponeretur. At si ejusmodi minutiis transversus ageretur, præscriberet Alter. Sin minus quod ipse scripseram arrideret, somnifera multifariam in promptu esse, Laudanum ficcum & liquidum, pilulas de cynoglossa, pilulas de styrace veteres mallet aut reformatas, diacodium, philonia, sulphura anodina, & alia non pauca. Ea singula idem præstare, quod à me descripta forbitiuncula. Unum è tot seligeret; sed seligeret denique. Frustrà aliam quamcumque curationem adstrui, quam assiduus tussis labor & per-vigilium aliundè destrueret. Quod biduum distulerat somniferum, impetratum demùm est, Ægrotante ipso de hac re ferio proloquuto. Subrogatę pilulę de Cynoglossa. Sopitus eà nocte est sopore placidissimo, vix à tussi expergefactus. Manè egregiè recreatus habuit longè melius: Minus ad pulmones fluxerat: facilior, expeditiorque erat, quod fuerat præmonitum, anacatharsis. Diffusus circumquaque rumor illicò est, Ægrotantem unicà nescio-



qua pilulâ restitutum. Alterius nomen proxime Æsculapium inscribebatur. Feste jam aræ, sacrificialis apparatus, votive hostiæ propè decernebantur *MEDICO LIBERATORI*. Ubi ille tantum ab opio utilitatis allatum sensit, iterum exhibuit. Et poterat tutius tunc exhiberi, cum depletis magnâ ex parte pulmonibus, quod de novo reflueret non multum esset. Biduo interjecto, ad alterum successive biduum eadem opii dosis iterata est, eque utiliter. Hæcinter vulgabatur à Partibus jam in vado rem esse. *Spiritus* ille arcanus de viridi æris, cæteraque omnia, uti dexterè opportunèque ministrata, ad cælum efferebantur. Contrà ego adnotabam Ægrotantis tussim minus quidem frequentem; non tamen minus anhelam respirationem: minus quidem quàm antea ad pectus depluere; pluere tamen quod satis esset ad excitandam tussim: eâ verò excitatâ novam accersiri usque materiam, tussisque causam. Observabam item à qualicumque tussis motu sic misero anhelitum accelerari, sicque eum

ha-



haberi, ut non tam lassus, quàm planè victus & penè exanimis relinqueretur; palamque esset diutius durare ipsum labori jam non posse. Et cæteroqui, superesse adhuc aliquid faciendum natura ipsa inter hæc monstrabat. Usu namque opii, etsi magna cominoda provenirent; alvus tamen (uti debuit) supprimebatur. Postquam languesceret opii virtus, mollior ea fiebat quod ociata erat veluti emendatura: ternisque aut quaternis subsequutis dejectionibus, quasi aliorsum divertisset, fluxio ad pulmones videbatur multo minor. Propterea quod natura monstraret iter, aggredendum putabam: quodque illucisque dilatatum omissumque fuerat, quia absolvi rem posse per anacatharsim speravimus, tunc denique exequeremur, priusquam ab eadem (quod fatis apparebat) frustratos nos doleremus. Vires universim (quantumvis privata tussis respirationisque organa attrita evidenter forent) stomachique vim abundè constare, ut posset locus adhuc esse catharticis. Alterum idcirco commonerent,



Cent. III.  
Observat.  
XXVIII.  
XXXI.  
XLIV.

quicum novum hocce consilium communicarem. Agi fanè de re non levi, quâque in unâ curationis securitatem, si quæ futura esset, ego reponerem. Quò major id suadenti esset authoritas, afferebam Riverianas historiolas, ut ovum ovo casui nostro simillimas. Et Æger quidem assentiebat; quippe qui intimè intelligeret, quo sua in statu res esset. Contigerat fermè cum præfati hæc eramus, quòd liquida fieri alvus cæperit.

Advenit statò tempore Medicus, quandam præ se ferens indignationem, utpotequi ægrè mecum conveniebat. Docui paucis quod ipse de novo sentirem. Spem ab anacatharsi ancipitem esse jam, & plenam periculi. Divertendum à pectore materiæ impetum, dum vires adhuc suppetarent. Quandoquidem id persudores tentatum frustra fuerat; frustra que per diuretica (quæ lenius agerent, quàm ut fluxionis motum valerent à superioribus evocare ad renes) neque adurentia malagmata, neque vomitus fuerant admissa; con-

fu-



fugiendum jam ad purgantia ; quorum vis effectusque certi utique nostrâ in manu positi essent : Id ipsius naturæ quasi voce significari , quæ restrictam opio alvum, ipsa resolvit semel atque iterum , cum diminuto ad pulmones fluxu. Modò quoniam alvus sponte suâ flueret , sustinendum : si cessaret , sollicitandum. Hic ille à me cum petiisset , *qualenam Purgantium proponerem ?* Indicationem , respondi, proposuisse me : non materiam medicam ; cujus in tantâ cathartorum amplitudine facilis erat selectus. Etsi quod Riverius simili in casu adhibuerat , utpote experientia probatum , haud imprudenti consilio revocari in usum poterat , vel semel , vel repetitò, prout res poscere videretur. *Neutiquam* , inquit ; *sed Gummi ammoniacum, quod sacrum pectori est : idque per epicrasimandum fore ; si tamen dandum.* Inde ubi paululum recollegit ipse sese , sublato rerum domino supercilio , coniectisque in me oculis , graviore vocis tono exorsus, *Atqui* , ait , *monitum te volo , subducere al-*  
*vum*



rum in pectoris morbis esse mortiferum: quin sicubi ea suopte ingenio liquefcit, omino- sum esse hisce in morbis: Hinc esse Medico- rum omnium in praxi consensum, scelus esse in affectibus ejusmodi, emollire ven- trem. Quod præsens flueret, fore utique cohibendum; sed (quoniam utile futurum ip- se reciperem) sineretur licet. Posse enim quæ- dam, præter omnes rationum & experientie regulas in Medicina quandoque incidere. De cætero, quod optimum factu esset, con- tineri in anacatharsi: neque ab hac receden- dum: neque spiritum æruginis removendum ullo modo esse. In eo expectorationis pecu- liare privatumque jus; in eo virium ac sto- machi vim resectivam; in eo pro pulmoni- bus balsamicam sulphuris virtutem; in eo, siquæ alia facere ad rem nostram possent, concludi omnia. Quapropter si nihil ultra afferrem, cassum vanumque esse quod attu- lisssem.

Insolens honestos inter viros loquendi ratio mihi quidem stomachum primò, ri- sum subindè movit. Quid enim sperares dicta,



dicta , quàm facta , meliora ? Cum tamen , quæ ille ex impotentia magis quàm pro bono Ægrotantis contrâ differuerat , cepissem , quod facillimum factu erat , refellere ; Scriptoresque medicos , simul cum Riverio , quem memoraveram , stare pene omnes pro mea sententiâ dicerem : *Discernendi* , inquit , *Scriptores sunt docti ab indoctis*. Statimque hæc fatus assurrexit : mus sitans de lassari se contentiosis disputationibus. Delicatuli scilicet ingenii est & molliter fastidiosi ; quique si qua ipse dixerit revocentur in dubium putet authoritati dicentis injuriosum. Ægrotantium autem rebus in commune consulere , mutatâ vocabulo significatione , contentionem vocat & jurgium. Quid facerem ? sivi denique , sibi placeret utcumque vellet : qui certò scirem quantamcumque operam me perditurum , manente penes ipsum curationis arbitrio : consciusque alias mihi essem , Ægro me atque mihi fecisse fatis.

Ille igitur , reliquis quibuslibet fusque deque habitis , inque anacatharsim unicè in-



intentus ærugineo suo spiritu rem omnem  
 absolvere fatagebat. Spontanæ dejectiones  
 ad diem alteram perseverabant. Ut ne  
 daretur eâ nocte opium author ipse eram,  
 metuens ventris restrictionem. Nullâ aliâ  
 ratione opus fuit, ut daretur. Dormiit  
 (quidni dormiret?) mollissimè plures ho-  
 ras: aliquantulum etiam strato corpore;  
 jam enim id posse cæperat. Ex decubitu  
 faciliior liberiorque humorum circulus: Un-  
 de aliquantò major ad pulmones fluxio;  
 restricto præsertim ventre (ut solebat) à  
 sumpto opio. Ejus rei causa nec quæreba-  
 tur, nec quæsita reperiiebatur. Vox nihilo-  
 minus invaluerat, Ægrotantem habere lon-  
 gè melius. Ipse verò traducebar per ora  
 Partium: fuisse futurum, si catharticum  
 Æger ex meâ sententiâ sumpsisset, ut man-  
 datus sepulturæ jam esset. Restitutæ sani-  
 tatis clarius extitit argumentum, quod ton-  
 deri ei barbam, mutarique mucida multo  
 adipe frequentique litu indusia permissum  
 est. Derasâ barbâ apparuit pristinus faciei  
 colorisque habitus ferè nihilum immuta-  
 tus.



tus. Ex quo causæ meæ non minimum commendationis & ponderis accedebat. Alvus adstricta adhuc erat ab usque dato opio : sed nil referebat , cum procederet pro voto Medici. Erat nihilominus quod usque flueret ad pectus , & creber anhelitus , & , quantumvis minus frequens , laboriosa ad extremum tussis ; quam miser contremiscens , si quando poterat , cohibebat. Jamque organa pneumatica resoluta penitus esse , suoque muneri sufficere amplius non posse , perspicuum erat. Attamen melius habebat , volebantque persuasum habere melius : adeo ut triduo elapso à detonsâ barbâ , iret tandem cubitum in suo lectulo jussus sit. Quò ille cæteroqui adhuc validus & corpore habilis suis se transtulit pedibus , & nemine adnitente reposuit. Cum per noctem horizontali decubitu membra straverit , expeditior circularis sanguinis motus consequutus est , concurrente simul omni spirituum momento ; quì à sustinendo corpore , hujusque perficiendis usibus feriantes cordi arteriis hu-



moribusque impetum auxerunt ; ut vel pedes , dimoto tandem diutino œdemate, ad integrum detumuerint. Hinc proscripto humore recepto in sanguinem , & suppressâ ad quatrimum alvo , febris intensior , subitaria novaque in pectus alluvio, huberior tussis causa , gravior respiratio, & à remorato sanguinis rapidius acti per pulmones progressu suffocatio atque inflammatio facta sunt : à spirituum verò cōfuso perversoque per cerebrum motu delirium.

Manè isthæc fermè reperi. Quibus alter Medicus ut provideret, præceperat ( maturiùs ut viserat ) dari alternatim horis singulis modò cyathum calidæ , modò binas ligulas olei amygdalini. Dederatque jam ipse , priusquàm abiret , præter amygdalinum , calidæ duo pocula. Qui nimirum doctos ab indoctis Authores adeò scitè discerneret , hic haud equè discernebat , secus esse succurrendum præfocationi , quæ à distentione membranarum spasmodicâ ; secus ei , quæ à spiritalium partium atoniâ atque

à



à matière farturâ sit. Cum autem à languente peterem : qualem se sentiret ? Qui, inquit, me sentiam ? qualem porro, qui spiritum vix trahit, & stomachum insuper habet plenum aquâ calidâ. Submoveri jussi ea omnia, darique operam sustinendæ respirationi, non extinguendæ : Hinc sublevari à decubitu, locarique altiori positu Ægrotantem, appositis ponè pulvinaribus, quo minùs anxie respiraret. Viribus, ut paulò superiùs notavimus, satis constantibus, periti Medici erat, siquid adhucdùm pro rei angustia tentasset : uti tentandum certè fuit ; sed non erat id mihi integrum. Quamobrem cùm proximè moriturum viderem, abii, neque amplius redii. Mortuus ille perendie est.

Hic Partes mutire primùm : mōx asseverare Ægrotantem aliàs à suo Medico, vel primo intuitu, pro mortuo habitum. Quod ultrò credimus. Quidni autem haberet pro mortuo, cui statim pauculas vitæ horas præfinierat ; cui Viaticum, cui extremam ipsam Uctionem tam tumultu-



tuariò , tàmque præcipiti festinatione ministranda procuraverat ? Verùm ubi illum suo se iudicio comperit , non item, puto , pro mortuo habuit. Etenim si de vitâ Hominis tàm certò desperaret ; quare deinde illius curationem mihi subripuit , sibi addixit ? quare conclamatum jam non reliquit mihi ? Quare tanta fuit ergà me humanitate , ut partem dedecoris sibi ultrò adsciverit , ne unus ego toti succumberem ? Quare quæ ego proponerem scrupulosè adeò rejiciebat ? Isthæc desperantis esse, quis eousque stipes erit ut credat ? Unde nàm præterea fuit , quod procedente curatione vulgatum unâ omnium voce est, emerfisse jam è vadis ægrotantem ? Ubi verò tonderi illi barbam , ubi iret tandem cubitum in suo lectulo jussit , tumne etiam habebat illum pro mortuo ? Id , fodes , offendere oculis nebulam , & rationi hominum insultare est.

At ego , ajebant , oscitabam è diverso in tam præsentî Viri discrimine ; neque egritudinis vim , qualis & quanta foret,

dig-



dignoveram. Nimirum non videram Em-  
 pyema: quod non inficior: sed actum de hoc  
 satis superque superius est. CATHARRUM  
 SUFFOCATIVUM, utcumque voluerim,  
 non poteram non vidisse: adeò erat in pro-  
 patulo. Quibus autem is conditionibus gra-  
 vior fieret, quæ timenda ne consequerentur,  
 quæque facienda essent, ut quæ timeban-  
 tur occuparentur; singuli quotquot à me  
 de morbo statuque Ægrotantis scisse libuit,  
 fusè intellexerunt: ut ex hæcenus narratis  
 intelligi vel fusiùs potest. Neque pro meri-  
 to asserebant, oscitasse me, aut vim egrit-  
 tudinis neglexisse; Qui adversus morbum  
 remedia majora statim ab initio vocave-  
 rim, quæque iidem ipsi, qui oscitasse me  
 ajebant, exhorruerunt. Quod certè non  
 de nihilo fuit; neque ut facerem levis con-  
 ceptu causæ adductum me fuisse creden-  
 dum erat: cujus aliàs curandi methodum,  
 ut timidam, & penè ociosam, atque à me-  
 dicinis, maximèque à mittendo sanguine  
 alienam vulgò reprehendunt. Quòd si os-  
 citare me dicant, quòd rumores in populo



inter curandum non excito ; quòd tumultuosus rerum ostentator , quòdque magnificus exaggerator non sum : dicant licet ! Pacatum mi animum natura dedit , omnisque osorem artificii . Neque idcirco qui meę se curę credunt , omnes periclitantur . Siqui autem pereunt ; non tamen pereunt ( nisi improvise id illis accidit ) ex Ecclesię Catholicę ritu non expiati : interlucente , quibus ego circundor , tenebris virtute & Sanguine Jesu Christi ; qui lux hominum est . Lux autem in tenebris lucet : sive in iis qui suas sentiunt tenebras , & profitentur .

Ego nihilominus ( objectabant ) morbum non esse mortiferum asserueram . Quid verò obstat , quo minus id ipsum nunc etiam asseram ? nullusne mortalium evasit à catharro suffocativo ? Imò aliquam multi . Sunt fanè morbi quamplurimi visu etiam gravissimi , qui sine Medici ope , aut certè minimâ , curantur . Alii sunt , qui nullâ quantalibet Medici industriâ operâque , curari possunt . Sunt qui à Medico

cu-



curari & possunt & debent. Ex horum numero ferme erat morbus, de quo agimus. Is, etsi lethalis ex se non est, sicubi tamen anacatharsi non solveretur, è pluribus, quos poterat, quosque ego præmonueram, lethalem aliquem alium morbum tracturus post se necessario erat. Istud à Medico provideri occuparique omnino debuerat. Si mihi uni libera curatio relinquebatur, aut fallor, aut mortuus Æger non fuisset. Sed statutus suus unicuique dies est. Qui ubi tandem advenit, ea interponantur oportet, quæ necessario secum perniciem ferant.

Addebant ultimò, seriùs accessisse suum Medicum ad curationem: cum nempe curationi locus amplius non erat. At citius fortè accessit, quàm opus fuit. Quod num ex ratione asseverem, paulò altius regrediendum est; nonnullaque huc revocanda, quæ cùm consultò penè intacta suprà reliquerim, ad hunc ferme locum rejeceram. Ex iis enim quæ fecit, quæ facturus ille fuisset, si accessisset antea, haud diffici-



ficilè , puto , conjicitur. Admissus ad cu-  
 rationem est die morbi decimaquintâ. Quæ  
 morbi periodus , si ejus spectes tempora,  
 vix initia prætergredi dicenda est. Malè  
 tunc habebat Æger , non tamen pessimè.  
 Decumbebat in lectulo distento corpore;  
 tametsi somnum longiusculum non nisi  
 sedens captabat. Suis se manibus vestiebat.  
 Nunc per ædes hanc illac inambulabat; nunc  
 absidebat amicorum colloquiis : ut nostræ  
 etiam consultationi adstitit unâ cum aliis.  
 Utprimùm exceptus coram Ægro sic se ha-  
 bente est , statim protulit Empyema. Post  
 annunciatum Empyema , auspicatus suam  
 curationem est à mutatione loci. Hæc erant  
 quædam veluti velitatio. A supernis ædi-  
 bus ad imas æstivasque descendere Ægro-  
 tantem jussit. Magnum porrò solatium  
 adversus æstus ferventis solis , quodque ego  
 nescieram excogitare ! Sed Æger nocte ha-  
 buit longè pejus : interdiu adhuc pejus:  
 nocte dieque alterâ deteriora omnia ad ter-  
 tium à descensu diem. Spiritum ducebat  
 difficiliorem; tussi acrius afflictabatur: cum-  
 que



que decumbere neque stare ullo modo jam amplius posset, sedere usque immobilis cogebatur; nec nisi reclinato in cubitos capite dormitabat, si quid per tussim liceret. Eoque tridui spatio, adducta res est, ut consuleret supremis suis, admonitus Æger sit: quemadmodum & consuluit, fortiter profectò & religiosè; postque hæc, cum mœrorem silentium plenam funere domum circumspiceret, induere miser speciem, partesque proximè morituri. Ut contigit tam præceps decidium ab ingressu novi Medici, equidem dubitabam fuissetne illius ingressus efficacior quàm ipse morbus.

Ut autem quàm fuerit salutaris ea ejus ad curationem accessio penitiùs introspiciatur, tria hæc notentur oportet. Prolatum Empyema: descensus in terrenas ædes: mortis annuntiatio. Num præpropere immaturoque judicio, atque inconsideratius asseruerit factum Empyema; num, factumne an infectum susque deque cum haberet, asseruisse tamèn libuerit, ipse viderit. Id certum est fieri non potuisse,



quominus Ægrum vehementer permoverit novi morbi notitia : quâ et Medici poeniteret , qui per imperitiam , vel per incuriam exegisset illucufque curationem ; & noviter auditi morbi truciori facie perterrefceret. Morbos fieri , factos, verò ingravescere, vehementium animi perturbationum accessu , quis est qui nesciat , ut pluribus id persuadere opus sit ? A mutato autem conclavi nasci quicquam mali potuisse , ne suspicatus Medicus quidem est. Sed qui difficile spiritum ducunt probe ipsi norunt , quousque malum auget aër conclusus minusque liber. Vidi ego sæpius ( et quilibet Medicorum viderit ) referare Asthmaticos cubiculi fenestras , cum suffocatio premeret ; quin domo raptim egressos petere vel intempesta nocte editiora loca , & aërem querere liquidiorém. Quòd verò aër in subterraneis caveis , in imis vallibus , in terrenis ædium conclavibus , similibusque locorum terminis interceptus , gravior sit , & respirationi minus idoneus ; exploratius in phycis mechanicisque est, quam



quàm ut in eo multum laboremus; cum vel barometro demonstretur. Quapropter mirum non est, si Ægrotans, qui jam antea difficulter spirabat, statim pejus habuit, atque in aërem descendit respiracioni minus accommodum. Cum quorum respiratio difficilior est, quacumque aëris alteratione vel minimâ ii lædantur; præque Aliis de facili percipiant vel minimam, siquam ille conceperit, novitatem. Id quidem ego protinus, sed incassum, animadverti. Post hæc, quoniam actum de præsentī jam esset, ut cogitaret de futurâ vitâ Ægrum monuit. Quod Vir magnanimus eximiâ pietate ac fortitudine exequutus est. Verum quisnam mortalium tantę animi securitatis uspiam sit, qui propositâ de vicinò morte non perhorrescat? Quod autem pavor respiracioni hujusque instrumentis noxius è directo sit, nemo, arbitror, est qui dubitet; cum non tam ratione cuique constet, quàm sensu. Ex eo siquidem fideratis, veluti spiritibus, cordis sanguinis ac spiritalium partium motus ususque intercipitur, vel cer-



tè languescit. Nec semel contigit subito incusso terrore ( nedum suppressa menstrua aut lochia; quod passim solet ) sed magnas suspensas hæmorrhagias , intercisam respirationem , lethales inductas syncopes. Et nedum terroribus vigilantium veris, sed vel imaginariis somniantium spiritum , vocemque strangulari communi Puerorum experientiâ notum est. Quam fanè pavoris vim versu complexus est , & penè definiit rei physicæ consultissimus quisquis ille est , qui ait

*Obstupui , steteruntque comæ , & vox  
faucibus hæsit.*

Quod si hos in Sanis facit pavor effectus, longè porrò deterius habiturus eos est , qui angustias pectoris patiuntur. Splendidissimum hujus rei exemplum , quodque loco omnium esse possit , habetur apud Petrum Forestum ex suæ uxoris Avunculo. Hic ortompnæa solitus identidem corripì , nocte quadam subito perculsus terrore , fuscitato inde paroxismo vehementissimo, pauculis horis sublatus est. Hæc ita cum

ha-



habeant , causæ in propatulo sunt tam præcipitis Ægrotantis nostri in deterius lapsus Prolatum inconsideratò Empyema ; imperata inconsultò mutatio loci ; oblata præproperè species vicinæ mortis. Iis novus Medicus ingressus auspiciis est. Neque est cur dicas , nullius culpâ id factum esse ; sed sponte morbi. Ut brevi tridui spatio Æger in præceps rueret ; non is profectò erat morbi ordo : cum fervet suorum motuum natura gradus , nisi transversâ quâpiam vi deturbetur. Et facti causas , quas nos contrâ adduximus , magnas eas esse probavimus , aptasque quibus magni responderent effectus. Quales eousque vidimus respondisse ; ut perductus ad extrema (quæ Medicus censuit) videri Æger potuerit.

Conabar ego inter hæc erigere jacentem animum. Etsi enim dubia tum erat meis dictis autoritas ; quia tamen quæ spem alunt pronius accipiuntur ; utcunque potui sustinui. Alter , ut vivere Ægrotantem præter opinionem & sua præfagia



sagia videret ; alia nihilominus de novo ur-  
 gebat : ajebatque , etiamsi vitam protrahe-  
 bat , futurum tandem , ut in phthisim inci-  
 deret. Ego , cum rescirem , futurum ne-  
 gabam , quousque sputum non salitum  
 non acre non exedendo ulceri esset ; ut cer-  
 te nondum erat , nec fuit in posterum : ta-  
 met si quòd possent alia perinde mala su-  
 pervenire non negabam. Relicta mox vani-  
 tate prognosticorum , conceptaque animo  
 spe curationis , ad hanc nervos industriam-  
 que omnem sedulò contulit. Ast præter mi-  
 nutiolas illas , quas suprà recensuimus , quid  
 novi attulit ad eam instituendam utilius ,  
 quàm ego institueram ? Indicationem ( quam  
 benè , an secus stabilieris summa omnium  
 curationum est ) novam profectò non attu-  
 lit , quàm ego ceperam , prosequutus . Attu-  
 lit autem , quæ ipse prætermiseram , un-  
 guenta & litus inungendo thoraci. Papæ ,  
 rem providam & fructuosam ! Quæ verò  
 inunctio , qui litus pingui corpori , suoptè  
 transpiratu per tempus æstivum mollito ac  
 lævi , cuique suusmet succus pro litu esset ?



Nùm erant transpiratio et sudor unctuosus  
 coërcendi , ut quod per cutis spiracula di-  
 verti foras non posset in pulmones relabe-  
 retur ? Nùm è re languentis erat assiduâ  
 affricari lituum molestiâ , aut rancido pin-  
 guedinum situ mucescere ? Sed nugæ hæ,  
 præ eo , quod præterea attulit. Attulit spi-  
 ritum viridis æris compositum. Arcanum,  
 marspiter , medicamentum ! Cuinam au-  
 tem Medicorum hisce temporibus non præ  
 manibus Ettmüllerus ? Is à suo in praxi in-  
 stitutore Joanne Michaeli remedium illud  
 mutuatus , sexcenties hâc illâc , ut suus est  
 mos , per sua Commentaria describit. Ve-  
 rùm quid illud denique est , præter acorem  
 vinaceorum è Cupri particulis ignis vi re-  
 ceptum , unâ cum spiritibus ex Ammonia-  
 co & sulphure prolectis , qui singuli aci-  
 dissimi sunt ? Nam si Tachenium adversus  
 Zuelpherum audimus , spiritus viridis æris  
 ipsissimum fermè est atque acetum destilla-  
 tum. Quòd si aliquid ex æris ramentis  
 abripuerit , inde est , quòd subverso sto-  
 macho nauseam primò creat ; proximè vo-



mendi quasi conatus ( ad quod non minimum facit immanis ille fætor , quo istud medicamentum esse horridum solet; ) consentientibus ultimò thoracicis instrumentis ; unà cum forti tussi promovet , etiam anacatharsim. Et credibile est , præter emeticam cupri vim, symbolum conferre suum acrimoniam vimque liquoris salinam , quæ fibras asperius vellicet. Quâ causâ & ipse vomitus et omnia quæ vomitum cient, paulatim et per interjecta spatia temporis ex ligulâ sumpta , utilia expectorando sunt, veluti quæ ex albo Veratro , Scillâ , Peto, similibusque conficiuntur. Eâque ipsâ ratione idem Ettmullerus , siquando hocce suo spiritu usus est , addidit aliquantillum de syrupo emetico. Idem præstitura existimo quæcumque œsophagum stomachumque reddunt nauseabundum , quæque acutiori quocumque stimulo irritant , & spasmus contrahunt. Cæterùm quod ajunt eam mixturam , quippè quæ acerrimo constat fale , cruda & glutinosa , vel ultra ventriculum , incidere attenuare resolvere, equi-



equidem magis credo, quàm intelligo. Etenim si per consuetas Chyli vias feratur in sanguinem, parum, puto, glutinosi occurret in venis arteriisque incidendum attenuandumque: extra illas nullum ei jus. Sinavia quàm data porta perrumpat, non tam viscida in cavitatibus concreta resolvat, quàm solidorum fibras atterat, per quas sibi, facto impete, viam quærit. Ad hæc dubium remanet, nùm sint acidissimi ii spiritus pectori, nùm febrienti utiles? Illud contrà minimè dubium, excitari iis violentius naturam, confertoque labore facere adigi, quod paulatino absque sui dispendio alias factura esset. Quare ex opportuno cautoque eorum usu, sicubi nempè nimium pressa natura per sese nequeat asurgere, juvari eam; ex inconsulto pertinacique atteri ac resolvi eamdem quis non videt? Hæc si alter Medicus dispexisset, haud deliberasset, opinor, curationem à capite ad calcem absolvere eo medicamento, quod, dum sanabat, occideret. Et sanè cum maximè restitutum credidit Ægrotan-



tem , tunc interfectum apprehendit. Neque potuit non providisse ; cùm inopportunum ego illius usum sepius improbassem. Quod Medico non latuisse ipse idem certò significavit eâ die , quâ pleno ore illiusmodi mixturæ laudes exaggeravit , quasi universam in eâ reperisset medicinam. Animus scilicet mihi erat , quoniam anacatharsim sequi libuerat , hanc adjuvare pro tempore convenientibus auxiliis , quod ferè solet , modicâ plerumque medicinæ ope , quandoque nullâ. Fortia siquidem molimina non semper natura patitur , gaudet contrâ opportunis : et suis donata alioqui est nullis mortalium satis intellectis machinamentis ad exequenda munia sua. Cæterò *Spiritus* ille ubi conveniat , efficax in primis remedium est ; dignusque qui non temerè laudetur. Siqui enim cùm veras mereatur laudes , falsas appingit , pretium ei demit : ut quum ait Alter , vim sulphuris balsamicam pro pulmonibus in eo contineri : Compertum aliàs cum sit nihil habere à sulphure ( secretâ sub destillatione

par-



partē butyraceā , cui vim illam balsamicam inesse putant ) præter volatilem aciditatem ; quæ cum tussim acriter stimulet, pectori potius infensa quàm utilis dicenda est. Verùm quicquid diceret de Spiritu, parum refert : proprium quippe et familiare esse illi videtur , quæ comperta minùs habet audacter jactare , freto Auscultantium vel dissimulatione vel ignorantia. Id autem quod refert plurimum, ejusdem *Spiritus* ministratio est. Qui quemadmodum dari utiliter Ægrotanti videri à principio potuit , ita perperam datus in posterum & continenter est ; quando nulla ejus necessitudo erat ; et sedari temperarique tussim, non concitari oportebat. Importunissimè verò & prorsus ineptissimè dabatur eo tempore , quo opium ministrabatur : votis nempe adversus vota è regione) tunc pugnantibus ; quando nihil aliud ab opio, quàm instrumentorum tussis quies , viriumque refectio præsumeretur. Sed jam *Spiritus* iste, ut erat Ægrotanti, ita & mihi , & , puto , etiam lectoribus fastidio est. Quare



illum dimittere tempus est , quia Medicus et ipse dimisit. Quando autem dimisit ? Ubi tandem jussu Ægrotantem in lecto decumbere reperit correptum mortis anhelitu. Eo mane inexpectato perculsus casu, fui oblitus medicamenti est , quando potiori certè ratione dari licebat. Subrogavit tamen aquam calidam , atque amygdalinum , utpote innoxia remedia ; cumque à fortiori notam metueret , dedit leviora majori cum culpâ. Ubi enim à distentione membranarumque contractura suffocatio est , oleosa ac diluentia ibi esse proficua possunt , quòd mollitis Partium fibris è facili sequatur anacatharsis sanguinisque progressus : Cum vero est ab immodica prægravantique sarcinâ humoris , mortem ea eadem maturant. Præcipuè si multâ copiâ ingerantur ( ut à Medico tunc factum imperatumque est ) distento ab ingestione ventriculo diaphragmatis motui obistente, laxatisque fibris facientibus ampliorem fluxioni locum. Neque difficile cæteroqui erat conjicere rei novitatem à præcipiti fuisse



fuisse humorum defluxu; cum argumento essent novus ad lineam horizontis decubitus, & pedum detumescentia.

Adnotavimus hætenus præcipua & potissima quæ Alter fecit, nullâ unquam à primo ad ultimum, neque ullâ ex parte mutatâ indicatione; sed, quam ego pro anacatharsi stabilieram, integra atque in perpetuum servatâ. Quas interjecit minutulas res hæc illâc supra percurrimus. Diuretica atque balsamica, quomodocumque præscripserit, utpote ad rem minus facientia, morbique motibus imparia, ultrò prætermittimus. De opiatîs, quæ à me præscripta, quæ detenta ab ipso, quæ data denique sunt, deque horum bono pravoque effectû, satis alibi dictum est: ubi dictum quoque, datum opium ultimò fuisse perperò consilio, restricta ad mortem usque alvo, quam servari liquidam expediret. Unum circa hoc obiter addo, quòd à principio, cum convenire ille mecum nondum refugeret, propositis per me opiatîs: *Cave, ait, ne nomina: si enim danda erunt: clam dabimus;*



*mus.* Reformidabat scilicet Vir peritissimus opii usum nomenque tunc cum maxime indicaretur. Restat modo, ut quæ ille non fecit cum essent facienda, quæque fieri prohibuit, paucis repetamus. Et poterat profectò, quæcumque accommodatior videretur corporis pars, in eâ appositis, quæcutim exedunt, consilio in thoracis affectibus salutari, excitare ulcus, quo humor ab interioribus evocaretur: Id facile impetraturus ab Ægrotante aliàs docili, qui-que, perturbatus ut tum erat mortis metu, non æquè ac antea restitisset, imperatori præsertim vitæ necisque. Hic tamen contempsit remedium, Recentiorum nonnullos fortè sequutus, qui à Medicina novis nescio quibus rationibus hoc idem pellunt. Tametsi ars non tam opinionibus constat, quàm experienciâ, quæ hac de re antiquissima est. Insuntque experienciæ et suæ rationes, quas convellere, cum sint rationes ipsius naturæ, non est quod laborent infirma hominum ingeniola. Quemnam verò Authorum sequutus ille est, ut nullam

pror-



prorsus haberet toto curationis tempore febris rationem ? Febris , opinor , sive morbus princeps ipsa est , sive producitur ab alio morbo si diutius duret nec intermittat , accuratè adnitendum est Medico , quò tempestivè illi occurrat. Negligi enim nullo pacto debet ea vis , quæ Animal universum intus extus distrahit dissolvitque. Ast expectorando illi etiam occurrebatur : nam purgato pectore defutura esset et febris causa. Id quidem prudenti artis conjecturâ disquirendum erat : Num esset Æger expectorando simul et febris ad finem usque salvis rebus duraturus ? Numvè è binis morbis tolli alter aliâ ullâ viâ quàm anacatharsi , maturiùs posset ; ut deinde duorum junctim instantium dilatâ victoriâ , adversus unum minori cum periculo pugnaretur ? num esset febris à morbo pectoris alius jam morbus : num alterius alter mutuò causa ; ut vel diversis machinamentis , vel unis iisdemque sed queis ambo ferirentur , forent oppugnandi ? Horum nihil ad Medicum pertinuit , mordicus persequutum



anacatharsim ; quantumvis pertinere maxime , monebatur. Ubi denique anacatharsis dubia esse cæpit , annon dignosci id debuerat ? annon erat , rejectâ priori , ad opportuniorem indicationem pro tempore confugiendum ? Minime omnium. Melius habebat Æger : absolvenda anacatharsi curatio erat. Quique ego suadebam , aliam indicationem instituendam , certâque Purgantium vi , qui pectus inundarent , humores derivandos ad intestina esse , absurdam exitiosamque rem suadebam. Sed id unicè reliquum erat , ut tunc suaderetur , & certè fieret. Indicationem expectorationis , quam Alter sequebatur , ego institueram ; mea illa erat ; qui nempè neque pulmonum debilitatem , neque , humorum alluenrium quæ esset copia , metiri antea potuerim. Quoniam verò adduci per illam Ægrotantem manifestam in perniciem modò viderem , mutandam denique consultabam. Cum re tamen verâ non tam mutari indicationem ex eo sequeretur , quàm locum modumque indicationis. Si-

qui-



quidem anacatharsis humores in pectore contentos tussi excreatuque rectâ evacuat per tracheam arteriam. Dejectio eisdem illos per inferiora deturbat. Interest autem inter utramque; quòd illa non prius evacuat quàm in pulmones irruerint: hæc utilius ab his avertit. Illa paulatim & longo tempore exhaurit: hæc confertim brevique subducit. Illa cum partium spiritalium laborioso opere et periculo, cumque somni, viriumque jacturâ: hæc immunis horum omnium. De cætero mirabar quòd purgantia tanto cum horrore is rejiceret, qui vomitum sudoremque laudasset, qui que ipse diuresim admitteret et procuraret: cum horum cujusque una penè eademque ratio sit; quæ non nisi ex prudentiâ medicæ varia est, secundum nempe varias ægrotantium conditiones. Et iniusta carnibus ulcera ad idem sunt, excitato in parte sensu doloris, eoque humoribus avocatis. Quin ipsa missio sanguinis, si rem bene dispicias, nil præstat aliud. Subtractâ namque materiâ alluvionis affectæ parti succurrit, ne



inundetur. Hincque monet experientissimus Sydhenamius, nisi ad uncias quadraginta subtracto sanguine, non curari tutò pleuritides. Utque ad Purgantia revertamur: naturâ ipsâ sæpè docemur horum usum in difficilioribus Catharris, quos solutâ sponte alvo solvi, passim observamus in praxi. Idque in Puerulis clarius adhuc fit, quibus, cum nesciant excreare quod tussiunt, illud ipsum deglutitum vice Cathartici est; mollitoque ventre, longis ii tussibus liberantur. Quod autem diceret Authores omnes Medicos prohibere Purgantia in thoracis morbis, esseque mortiferum iis in affectibus liquare ventrem, acervatim atque indiscriminatim dicebat magis, quàm ut deceret intelligentem quæ diceret. In Pthysi enim, iisque pulmonum morbis, in quibus, aut ulcus, aut infixum aliud quicquam fluxionem provocat, non tentanda alvus temerè est, ne plus noceas quàm prodis medicamento, quod stimulum causamque tussis nulla ex parte potest vel revellere vel minue-



nūere. Fluxionum verò catharralium ratio est longe alia : in quibus, si præcipue adpectus impetuosius ruant, nullus Practicorum est, qui Purgantia, clysteres aciores, & quicquid aptum est derivare aliò fluxus impetum non inculcet. Quod eoufque notum vulgò est, ut longus in eo esse, ineptire sit. Neque dumtaxat avertendis catharris necessaria cathartica sunt; verùm et ad Empyemata (etiamsi adfuisset Empyema, quod ille ab initio obtrudebat) efficaciter purganda maxime commendantur ab Authoribus, specialius à Daniele Sennerio. Hunc sigillatim nomino, quia et Alter antea nominaverat, quo nothum illud suum Empyema hujus auctoritate suffulciret. Apud quem, ubi agit de Empyemate, uti spurium illum filium quem ipse afferebat, omissum à Typographo reperiatur, ita quod ego nunc profero de usu Catharticorum abundè occurrat. Scriptores alios cautiùs & timide nominaverim, qui nesciam quos probet aut improbet constitutus lege latâ Scriptorum Censor. Et



Lazarum Riverium ut fortè protuli, acriter me castigatum memini cenforiâ illâ voce: *Distinguendum esse doctos inter, indoctosque Scriptores.* Equidem, cùm sim de facili credulus, putaveram hucusque esse Riverium in re Medicâ non contemnendum Authorem; qui fuerit Græcis Latinisque literis eruditus; qui bonis artibus & multifariâ disciplinis pro ratione suorum temporum institutus; qui Hippocratis, Galeni, veterumque omnium Medicorum placitis penitiùs, siqui uspiam alius, imbutus; qui in Chymicis præ primis exercitus; qui ditissimus selectioribus medicinis; quique longo artis usu experientissimus. Ad hæc noveram, magna celebritate, dum viveret, per Galliam atque Italiam circumferri Viri nomen; deinceps verò scripta ejus per universam Europam communi omnium acceptance vulgata. Sed liberati universali hoc errore jam sumus; Habito enim nunc denique censu Homo plebejus in Ceritum Tabulas relatus est. Nihilo tamen minùs haud faciliè exue-



re est præconceptam diu animo erga Hominem reverentiam : pudetque abnegare nunc Magistrum , à quo aliquam multa doctus sim. Nec æquum aliàs humanumque esse reor , insultare nos Majoribus nostris, eosque ignorantix redarguere , si quod pauxillum præ illis progressi sumus , minimo plerique merito nostro , sed aut ferioris ætatis beneficio, aut alieno labore atque industria. Et videbam interea non nisi injuriã atque ad Cenforis arbitrium libidinemque è doctorum hominum censu , recepto Senerto, expungi Riverium; cum ceteroqui in re Medicã doctrina una eademque utriusque sit. At esto : ineruditus indoctusque sit præ Cenfore Riverius : in curatione tamen , quam ego afferebam , imitandus certe ille erat , quam prosperè cefsisse videmus , et commendaret experientia : talique Cathartico ad avertendum à pulmone fluxum ( quem nostrum fuit avertisse ) erat utendum , quali se usum scribit Riverius, forti scilicet atque acri , cuique vires inessent , quæ fluxionis vires impetumque vin-



cerent : nequaquam Gummi ammoniaco quod vix purgat ; quodque nostro isti Medico non excidisset, si rationem vimque indicationis equè ac Riverius intellexisset. Verum neque ammoniaco, cuius ipse idem meminerat, neque alii pharmaco, quod alvum duceret, datus locus. Quin opio restricta ea tandiu est, donec Ægrum reperimus constitutum in mortis limine. Illud autem quod in præcipiti casu tunc esset faciendum, loco eorum, quæ facta ab Altero sunt, Prudentibus Artis Medicis relinquimus judicandum. Remorari in pulmonibus sanguinem, hincque concepisse eos inflammationem aucta febris acuties, undosi pulsus durities, delirium, cæteraque omnia signa loquebantur. Aderant contrà constabantque universim vires: quod exaggerabant Adstantes, & vividusdum Ægri habitus manifestabat.

En igitur, ut iis quæ Medicus fecit, quæ fieri vetuit, quæque omisit facere perductus Æger est ad interitum ; utque malè dicebatur, serò ad curationem venisse ; qui  
cùm



cùm multa fecerit , plura adhuc et longè  
 utiliora facere potuit. Quid verò fuisset,  
 quid non fuisset facturus , si maturius atque  
 à principio venisset , nescimus quidem. Id  
 modo scimus , eum turbatis in rebus , cùm  
 à morbo ipso adulto jam et grandiori quæ  
 fieri expediret clariori nec unâ voce doce-  
 retur , nescisse unquam recedere ab illo  
 uno , quod in pacatioribus & morbi veluti  
 infantia ego posueram: unam prosequutum  
 pertinaciùs indicationem , unoque temerè  
 confisum , eundemque egregiè ludificatum  
*Spiritu Asthmatico Michaelis*; malè inte-  
 rea oblitum gravissimi illius Sydhenamii  
 effati. Non Receptulis , quas vocant , ne-  
 que speciosis remediorum formulis ; sed  
 recto morbi, huiusque causarum motuum-  
 que conceptu , rectaque hinc petita indica-  
 tione Artem Medicam comprehendì.

Quod si dixerint seriùs ad curationem  
 venisse Alterum , cùm nempè non erat am-  
 plius curationi locus , quasi perductus  
 Æger per me jam tum esset ultra omnem  
 curationis viteque spem. Id quidem non



ita habere , satis , puto , liquet ex iis , quæ hucusque retulimus. Præterea quæ ipse feceram ante Alterius Medici adventum non improbata , imo affatim commendata me coram ab eo sunt. Si verò alibi improba-verit (quod ab iis quæ à Partibus vulgaban-tur conjici tum licuit ) tempus jam est , ut quæ artis imperitis tunc persuadebat , tan-dem et peritis persuadeat. Ego sanguinem miseram ; purgaveram ; dederam emulsio-nes ex papaverinis & lenientibus ; constite-ramque in anacatharsecos indicatione ; sin minus benè cederet , hanc relicturus ; cum causæ in eâ consistendi eamque relinquen-di à primo ad ultimum eadem usque per-manerent. Rationum momenta quibus ad-ductus ea feci , superius exposui. Ubi con-stitutus reus fuero , meliora fortè suppetet accusatio.

Nullam autem instruet Alter accusa-tionem , qui modestè se gerebat inter cu-randum ; qui honorifice , ubicumque res ferret , de me loquebatur ; quique , si quan-do interrogaretur de meæ curationis insti-



tutione, vel aliò avertēbat sermonem, vel apertè agebat de iis quæ facta essent, non esse amplius disquirendum. Atqui exoluerunt artes istę, putidæque jam sunt. Qualem se absentem gesserit, ipse viderit. Dum coram esset quàm modestè quàm honorificè mecum egerit, colligitur, puto, ex narratis. Quorsum verò istiusmodi Hominis dissimulatio, tolerantia, reticentia? Cur non docet tandem, quę curando peccaverim, ut emendem? cur hanc mihi invidet poenitentiam: quæ illi tam importuna, tamque aliena à charitate mei charitas? quæ nova modestia! Promat condita siquæ habet in scriniis uerecundæ istius sapientiæ. At promat demum: et patiatur humaniter me, Remque omnem Medicorum publicam immortali novoque isthoc suo nescioquo beneficio augeri atque ornari.

His propositis palam est, uter Hominem jugulaverit. Empyema, quod nusquam erat, Alter enunciavit: Morbi statum, tempora, motus non intellexit: deceptus suis prognosticis ubique est: quę be-



nè fecit; vel meis indicationibus fecit, vel  
 me authore: quæ malè; pro suo arbitrio.  
 Me facti infontem fatis, opinor, demon-  
 stravi. Atque utinam purgare me potuissem  
 Altero indemni. Sed quum eò rem adduxe-  
 rint, ut culpari alterutrum necesse foret;  
 commodius visum mihi est, si Alter culpa-  
 retur potius quàm ego. Neque porrò jus  
 fasque erat, ut qui maximam potissimam-  
 que curationis partem suo Marte suumque  
 ad arbitrium peregerat, abiret copiosè ab-  
 solutus; ego qui minimam attigeram, dam-  
 narer omnium sententiis. Restat modò, ut  
 ipse culpâ se expiet, eamque in me regerat.  
 Etsi non tam illi facile futurum confido  
 hanc mihi notam appingere, quàm mihi  
 promptum diluere. Absit verò, ut ex arro-  
 gantiâ hæc dixerim; quæ vim habitura uni-  
 câ hâc ratione speramus; quia nobis causa  
 certò est longè melior,

Neque intereâ suspicari quempiam ve-  
 lim, odio me ullo hæc scripsisse. Etenim  
 (licet justè indignationis causa non deerat)  
 quænam idonea mihi esset odii causa? Me-



dicus quidem , qui talem se gessit , sibi met  
 ipsi , non mihi , fuit injurius : siquidem au-  
 cupari per has artes vulgi rumusculos, pro-  
 pius ad infamiâ est , quàm à famâ. Qui ve-  
 ro è suis partibus erant , utpote Artis impe-  
 riti , qualenam de Medicinâ aut Medicis  
 ferrent judicium , ut prodesse uni , noce-  
 rent alteri ? Et est alioqui suus unicuique  
 sensus : & propria sunt animorum studia : &  
 liberæ voluntates.

Scripsi itaque , quod à principio rece-  
 peram, ut Veritas in medio statueretur, un-  
 de & Iustitiæ locus esset. Par erat præterea  
 qui adeò publicitus ultrò citroque distra-  
 ctus fuerit , propriè eum , quod in ipso fo-  
 ret , dignitati consulere. Bis enim ; semel  
 à LUDOVICO dulcissimæ recordationis  
 FILIO ; iterùm à PHILIPPO PATRE po-  
 tentissimis Hispaniæ Regibus ad hono-  
 rem profectò summum faciendæ REGIIS  
 FILIIS medicinæ vocatus quum sim ; meum  
 esse videbatur id mihi decus tectum far-  
 tum tueri , ne illo indignum argueret pa-  
 tientia. Et debueram Ejus , qui Regibus



de me sponndit , præcipuam habuisse  
 rationem ; ne fortè Is , sin minùs dece-  
 ptor , certè deceptus videri posset. Nec  
 denique non æquum fuit , Cæteris om-  
 nibus , qui me utuntur Medico , satisfieri ;  
 ne sui eos de me iudicii puderet. Quod  
 omne aliquatenus factum rebar , si traduci  
 impunè per ora hominum me non sinerem ;  
 sique pro viribus , quantulæcumque hæ-  
 sunt , significarem , non adeò me infantem  
 hospitemvè esse in re Medicâ , qui meæ , si-  
 quando in angustias cogar , dicendę quo-  
 quo modo causæ non sim , vindiciisque ab  
 idoneis Iudicibus postulandis. Quamvis nil  
 certò opus erat hoc nostro qualicumque  
 molimine ; siquidem DEUS OPTIMUS  
 MAX. vindex Veritatis & Iustitiæ , cuique  
 perspicua atque in aperto sunt omnia ,  
 ipse Patronus bonæ causę est ,  
 ipse idem Iudex.

S. C. S. R. E.















